

摘藻堂四庫全書薈要

史部

欽定四庫全書薈要

史部

通志卷四十

六至
八



詳校官員外郎臣楊世綸

欽定四庫全書薈要卷八千九百四十五

史部

通志卷四十六

宋 右 迪 功 郎 鄭 樵 漁 仲 撰

謚略第一

謚上

序論五篇

謚中

謚法三篇

謚下

後論四篇

謚上

臣謹按字有不可避諱者謚法是也故此三篇並從本字

序論第一

古無謚謚起於周人義皇之前名是氏亦是號亦是至神農氏則有炎帝之號軒轅氏則有黃帝之號二帝之

號雖殊名氏則一焉堯曰陶唐舜曰有虞禹曰夏后湯曰殷商則氏已異於名堯曰放勳舜曰重華禹曰文命湯曰武王則號已異於氏然是時有名號之別者不過開基之祖耳夏自啟商自太甲皆一名而生死通稱若其曰祖曰宗為中為高則又不可常也以諱事神者周道也周人卒哭而諱將葬而謚有諱則有謚無諱則謚不立蓋名不可名已則後王之語前王後代之及前代所以為昭穆之次者將何以別哉生有名死有謚名乃

生者之辨謚乃死者之辨初不為善惡也以謚易名名尚不敢稱况可加之以惡乎非臣子之所安也嗚呼春秋紀實事而褒貶之說行謚法別昭穆而美刺之說行當其時已紛紜矣後之人何獨不然臣恐褒貶之說不已則春秋或幾乎息矣於是作春秋考春秋傳又恐美刺之說不已則周公之意其亡矣夫於是作謚法使百代之下為人臣為人子者知尊君嚴父奉亡如存不敢以輕重之意行乎其間以傷名教者也

序論第二

天下有難行之道雖曰古有是道而後世終不可行者
非古有是道也後之人設是道以實之耳豈有可行於
古而不可行於今之道乎若曰臣子可以議君父之得
失使有德則謚善無德則謚惡大行受大名細行受細
名行生於已名生於人此真不可行之道也自非伐無
道誅有罪收其鯨鯢以為京觀則安得有惡謚之稱乎
臣以為立謚之意本為昭穆命謚之義取於尊隆且生

有惡死無惡者人之情也生可簡死不可簡者禮之事也生雖侯伯死必稱公生不踰等死必加等先王之通制也豈有稱生之號有隆而命死之名有虧乎謚亦有惡惡謚非所以加君父也子曰父在觀其志父沒觀其行三年無改於父之道可謂孝矣不若是不當於人心子議父臣議君秦人之所厭而削之也今先儒之所為謚者正秦人之論耳不合乎古道

序論第三

按謚法惡謚莫如桀紂其次莫如桓靈其次莫如幽厲此古今之所聞也以臣所見皆不然桀紂是名耳非謚也名者生之所命而非死之所加也當夏之季當殷之興則未有謚桀非謚也當殷之季當周之興雖有謚法然得謚為榮不得謚為辱名之以紂辱莫大焉桀之所名者取於木猶高柴公孫枝之所取云耳豈有賤人多殺之名而可以為名乎紂之所名者取於絲猶臧紇南宮縚之所取云耳豈有殘義損善之名而可以為名乎

是名也非已之所更即父兄之所命也安得有是義乎

桓於經典並無惡義如公執桓圭桓乃珪璋之首稱如桓桓武王桓乃果毅之盛德齊之桓公用能霸業周之桓王元無累行安得桓為惡名乎靈者神聖之異名周之東也王綱不振四方解體迨乎靈王周道始昌諸侯服從故傳曰惟有髡王甚神聖以其生有神聖之德死則謚之以靈是為名實允當其曰請為靈若厲者荆蠻不根之論也安得靈為惡名乎幽者隱之並名也周幽

王喪於犬戎之禍魯隱公卒於羽父之難皆臣子所不忍言故以幽隱命之痛惻之甚也豈有擁遏不通之義乎語曰子溫而厲威而不猛恭而安厲與安並德故於厲言而猛則異於是故於猛言不厲非惡也豈有暴虐無親之義乎厲王過矣使厲王而有暴虐無親之名則宣王不得為孝子幽王過矣使幽王而受擁遏不通之責則晉文侯鄭武公不得為良臣成周之法初無惡謚謚之有惡者後人之所立也由有美刺之說行然後人

立惡謚

序論第四

謚之有善惡者即文而見不即說而見且曰戾曰刺豈
不見其有凶德何必以不悔前過然後為戾暴慢無親
然後為刺乎一戾不足其說又益之以戾一刺不足其
說又益之以刺非古之道也曰蕩曰荒豈不見其有淫
行何必好內遠禮然後為蕩縱樂無度然後為荒乎一
蕩不足其說又益之以蕩一荒不足其說又益之以荒

非古之道也謚之善惡可即一文以見義一文不得而盡者即複文以見義複文不足以盡者又從而加之如衛之公孫枝是為惠貞文子亦古之道何必為之說以釋之乎釋之之言既多又非載籍之常義學者而盡欲以善惡之義通之其有名實相違而義不可通者則必迂其說曲而通之也桀紂初非惡名桓靈亦非惡謚由其君而衆惡所集使名與謚不能主也人聞其名見其謚則翕然以為惡矣且愛人愛其人之烏惡人惡其人

之狗烏狗何與於善惡但隨人好惡所生矣是以君子惡居下流故名之曰幽厲

序論第五

法之為謚者取一文耳非有說也謚法行而其說紛紛成書見於世者有周公謚法有春秋謚法有廣謚有今文尚書有大戴記有世本有獨斷有劉熙之書有來興之書有沈約之書有賀琛之書有王彥威之書有蘇冕之書有扈蒙之書有蘇洵之書其實皆由漢魏以來儒

生取古人之謚而釋以已說集而為法也故蘇氏曰周公之法反取賀琛之新法而載之書是知世之謚法其名尤古者益非古法也余考周公之書所用後人之語甚多是皆為謚法者展轉相因言文雜揉無足取也惟沈約之書博採古今詮次有紀然亦無所建明至蘇氏承詔編定六家謚法乃取周公春秋廣謚沈約賀琛扈蒙之書斷然有所去取其善惡有一成之論實前人所不及也皇也帝也王也公也侯也君也師也長也胥也

實尊卑之號上下之稱且生有爵死有諡以是為諡未
之敢聞也若帝王可以為諡則天子亦可以為諡矣若
公侯可以為諡則卿大夫亦可以為諡矣若師長可以
為諡則父兄亦可以為諡矣無義之談莫此為甚經幾
百年間而後蘇子開之堯取累土以命名舜取濃華以
命名禹取於獸湯取於水桀以喬木紂以繹絲是非已
之所更必父兄之所命也且生有爵死有諡以是為諡
未之敢聞也蘇氏未暇及臣不敢後焉謹條其可用者

二百十諡分為三類只以一文見義無事乎文之廣無
事乎說之繁庶乎表裏蘇氏之學是亦典禮之大者

諡中

上諡法

神聖賢文武成康獻懿

元章釐景宣明昭正敬

恭莊肅穆戴翼襄烈桓

威勇毅克壯圉或作禦魏安

定簡貞節白匡質靖真

順思考曷顯和元高光

大英睿博憲堅孝忠惠

德仁智慎禮義周敏信

達寬理凱清直欽益良

度類基慈齊深溫讓密

厚純勤謙友祁廣淑儉

靈榮厲比絜舒賁逸退

訥 悷 述 懋 宜 哲 察 通 儀
經 庇 協 端 休 悅 綽 容 確
恒 熙 洽 紹 世 果

右百三十一諡用之君親焉用之君子焉

中諡法

懷 悼 愍

亦作閔

哀 隱 幽 冲 夷

懼 息 攜 卹 愿 倣

右十四諡用之閔傷焉用之無後者焉

下諡法

野夸躁伐荒煬戾刺虛
蕩墨憊亢千褊專輕苛
介暴虐愎悖凶慢忍毒
惡殘曩攘頑昏驕酗湏
僥狃侈惑靡溺偽妄讎
諂誣詐譎訕詭姦邪慝
蠱危圯懦撓覆敗戮疵

養費

右六十五諡用之殲夷焉用之小人焉

凡上中下諡共二百十言以備典禮之用

諡下

後論第一

凡蘇氏所取一百六十八諡三百十一條臣今只即一文以見義即文可以見文不必曰施而中理曰文經緯天地曰文即武可以見武不必曰克定禍亂曰武保大

定功曰武即孝可以見孝不必曰慈惠愛親曰孝能養
能恭曰孝即忠可以見忠不必曰盛衰純固曰忠臨患
不忘曰忠且即文以見義則文簡而義顯舍文而從說
則說多而義惑蘇氏所削為多矣臣今復削去三百十
一條之說只從百六十八諡而增損焉實得二百十諡
分而為三上諡百三十用於君親用於君子下諡六十
五用於殲夷用於非君子中諡十四用於閔傷用於無
後者其有堯舜禹湯桀紂六文乃人名非諡法所宜去

也陳胡公滿者言其老也有胡耆之稱焉胡非諡義齊
有丁公名也漢有丁公姓也丁非諡義故去胡去丁曰
商曰使曰軍曰趨曰鼎曰莫曰敵曰震曰攝曰草曰易
曰素曰頃凡十三文雖有其諡於辭義未安所宜去也
曰原曰愛曰聲曰聞曰要曰強曰平凡七文文雖可用
於義不專亦宜去蘇氏所取者百六十八諡今去其二
十八凡蘇氏所去者百九十八今取其七十二諡披沙
得金甄金去土非相違也而相從也

後論第二

蘇氏去其歷代所以為尊卑之號者九皇帝王公侯君
師長胥是也子曰左丘明恥之丘亦恥之蘇氏去其義
之不安者八今取其賁取其逸請以待丘園也蘇氏去
其子孫不忍稱者九十四今取其暴取其虐取其愎取
其凶取其悖取其慢取其忍取其毒取其惡取其戾取
其攘取其頑所以待暴戾取其昏取其驕取其醜取其
湏取其撓取其狙取其侈取其惑取其靡取其溺所以

待淫侈取其諂取其偽取其譴取其妄取其誣取其詐
取其譎取其訕取其詭取其姦取其邪取其慝取其蠱
所以待姦回取其危取其圯取其撓取其覆取其敗取
其斃所以待覆亡取其懦取其疵取其饕所以待貪鄙
蘇氏去其名之不能舉其人之要者八今取其退取其
訥所以待恬退之士取其修取其訓所以待禮法之人
蘇氏去其鄙陋不足以訓者十有一今取其僇取其述
爲靖專者備也蘇氏去其泛濫不可指明善惡之狀者

七今取其懋為黽勉者備也取其宜為中庸者備也蘇氏去其重複而無益於用者五十七今取其哲有異於智也取其察有異於明也取其通有異於敏也取其儀有異於穆也取其經有異於憲也取其庇有異於禮也取其協有異於順也取其端有異於直也取其費有異於夸也取其休取其悅有異於凱也取其綽取其容有異於寬也取其確取其恒有異於介也取其熙取其洽有異於和也

後論第三

蘇氏於百六十八諡之外有七去三百十一條之中有六類七去者削其文六類者易其義臣今此書只以文顯不用義說故於六類亦無所用但第四類中比儉二義於文未安不得不為之說儉乃恭儉之儉比乃協比之比儉也比也古之美諡也蘇氏引儉則固之義而更之曰菲薄廢禮曰儉引君子周而不比之義而更之曰事君有黨曰比以比儉二諡內於惡德此臣之所不取

也儉若為惡德則夫子溫良恭儉之儉其將何處比若為惡德則協比其鄰婚姻孔云之比其將何為若之何以不中禮之儉為儉朋比之比為比乎臣今易置從古道也

後論第四

語曰孔文子何以謂之文也子曰敏而好學不恥下問是以謂之文也然則文子之謚初無謚法仲尼則因問而即其人之行事以釋之奈何先立其法必使人之曲

中也規矩本為方圓設而非豫為小大劑量使制器者
範圍於此况所作之法只採經傳之言其間有大不通
理處子曰敏而好學不恥下問是以謂之文而云敏而
好學曰文可也孟子曰陳善閉邪謂之敬而云陳善閉
邪曰敬可也易之益曰君子見善則遷有過則改而云
遷善改過曰益可也左氏曰共用之謂勇而云率義共
用曰勇可也柰何詩曰哿矣能言巧言如流曰哿可乎
書曰賓于四門四門穆穆而云闢于四門曰穆可乎傳

曰季子生而有文在其手曰友遂命之而云有文在手
曰友何義也書曰乃聖乃神乃武乃文而云乃聖乃神
曰武何義也詩序曰太平之君子能持盈守成而云持
盈守滿曰成何義也至於終始如一者則謂之終為人
所渴望者則謂之渴於義安乎取並后匹嫡之義而為
並取牝雞之晨惟家之索義而為索是可用乎千百年
間學者見之禮官博士行之而斷無以為非者

通志卷四十六

欽定四庫全書薈要卷八千九百四十六

史部

通志卷四十七

宋 右 迪 功 郎 鄭 樵 漁 仲 撰

器服略第一

尊彝爵觶之制

臣舊嘗觀釋奠之儀而見祭器焉可以觀翫可以說義而不可以適用也夫祭器者古人適用之器若內圓而外方內方而外圓若之何飲食若臺而安器若

器而安臺或盛多而受少或質輕而任重若之何持
執以此事神其不得於古之道明矣原其制作蓋本
於禮圖禮圖者初不見形器但聚先儒之說而為之
是器也姑可以說義云耳由是疑焉因疑而思思而
得古人不徒為器也而皆有所取象故曰制器尚象
器之大者莫如壘物之大者莫如山故象山以制壘
或為大器而刻雲雷之象焉其次莫如尊又其次莫
如彝最小莫如爵故受升為爵受二斗為彝受五斗

為尊受一石為罍按獸之大者莫如牛象其次莫如
虎雉禽之大者則有雞鳳小則有雀故制爵象雀制
彝象雞鳳差大則象虎雉制尊象牛極大則象象尊
罍以盛酒醴彝以盛明水鬱鬯爵以為飲器皆量其
器所盛之多寡而象禽獸賦形之大小焉臣謹按沈
約與劉查論宗廟犧尊約云鄭康成答張逸謂為畫
鳳凰尾婆娑然今無復此器則不依古查曰此言未
必可按古者尊彝皆刻木為鳥獸鑿頂及背以出內

酒魏時魯郡地中得齊大夫子尾送女器有犧尊作犧牛形又晉永嘉中曹疑於青州發齊景公塚得二尊形亦為牛象此古之尊彝為可據也又按王肅注禮以犧象二尊並全刻牛象之形鑿背為尊其說益可據也又按陸佃禮象所記章惇家有古銅象尊三足象其鼻形望而視之真象也此又見象尊之制出於近代矣又按爵與觶皆飲器觶大而爵小陸佃禮象云今秘閣及文彥博李公麟家皆有古銅爵有首

有尾有柱有足有柄祭統曰尸酢夫人執柄夫人授尸執足先儒謂柄為尾蓋不見此制焉然古銅爵今之士大夫家亦多有之臣見者屢矣謂其口似雀之狀如今之荷葉杯葵花盞皆取其口之象而非謂通體為雀也今祭器之爵徒設雀形而妨於飲者按禮器云卑者舉角注云四升曰角角之類則有觚有觶有散有觥觥與爵同為飲器而爵為小角與觥觶散觥同為一類而觥為大故觥則取兕角而以為罰器

兕之為獸獸之大者也按舊圖匏爵用匏片為之則知角爵剗角為之所謂觚謂解謂散謂觥者名號不同大小異制耳

君臣冠冕巾幘等制度

歷代冕弁

黃帝作冕垂旒目不邪視也充纁耳不聽讒言也唐虞以上冠布無綏夏后以牟追以收商制章甫或以舄形制並無文周制弁師掌王之五冕皆玄冕朱裏纁紐五

采繅十有二就皆五采玉十有二玉笄朱紘諸侯及孤
卿大夫之冕各以其等為之秦滅禮學郊社服用皆以
衮元漢興草創仍秦之舊

蔡邕獨斷云衮紺繒也班固東都賦注云衮皂也衮音鈞

及光武踐阼郊祀天地明堂皆冠旒冕前後還紘孝明

帝永平初詔有司采周官禮記尚書夏侯氏說公卿以
下冕皆廣七寸長尺二寸前圓後方朱綠裏元上前垂

四寸後垂三寸係白玉珠為十二旒以其綬采色為組

纓

禮記曰玄冠朱組纓天子之服是也其旒珠用真白玉

三公諸侯七旒青玉珠

卿大夫五旒黑玉珠皆有前無後各以其色綬為組纓
旁垂黹纁助天子郊祀天地明堂則冠之魏因漢故事
明帝好婦人之飾冕旒改用珊瑚珠晉因之東晉元帝
初過江服章多闕而冕飾以翡翠珊瑚雜珠侍中顧和
奏舊禮冕旒用白玉珠今美玉難得可用白璇珠從之
後帝郊祀天地明堂宗廟及元會臨軒改服黑介幘通
天冠平冕皂表朱綠裏廣七寸長一尺二寸加於通天
冠上前圓後方垂白玉珠十二旒以朱組為纓無綏王

公卿助祭郊廟冠平冕王公八旒卿七旒組為纓色如
綬也宋因之更名曰平天冕天子郊祀及宗廟服之王
公並用舊法齊因之梁因之其制前垂四寸後垂三寸
旒長齊肩以組為纓色如其綬旁垂黹纁充耳珠以玉
瑱乘輿郊祀天地明堂享宗廟元會臨軒則服之五等
諸侯助祭平冕九旒青玉為珠有前無後各以其綬色
為組纓旁垂黹纁陳因之以為冕旒皇太子朝冠遠遊
冠侍祭則平冕九旒五等諸侯助祭郊廟皆平冕九旒

青玉為珠有前無後各以其綬色為組纓旁垂黹纁北
齊採陳之制旒玉用五采以組為纓色如其綬其四時
郊祀封禪大事皆服袞冕皇太子平冕黑介幘白珠九
旒飾以三采玉以組為纓色如其綬未加元服則空頂
黑介幘雙童髻雙玉導後周設司服之官掌皇帝十二
冕祀昊天則蒼冕五帝各隨方色朝日同青冕夕月同
素冕地祇同黃冕神州社稷同元冕享先皇加元服等
以象冕享先帝食三老耕藉等以袞冕視朔大射等以

山冕視朝臨法門適宴等以驚冕皆十有二旒諸公之
冕九一曰方冕二曰衮冕三曰山冕四曰鷩冕五曰火
冕六曰毳冕皆九旒七曰韋冕八曰皮弁九曰玄冠諸
侯八無衮冕諸伯七又無山冕諸子六又無鷩冕諸男
五又無火冕冕五旒三公之冕九一曰祀冕二曰火冕
三曰毳冕四曰藻冕五曰絺冕六曰爵弁七曰韋弁八
曰皮弁九曰玄冠三孤自祀冕而下八無火冕公卿七
又無毳冕上大夫六又無藻冕中大夫五又無皮弁下

大夫四又無爵弁士之服三曰祀弁二曰爵弁三曰
玄冠庶士玄冠而已隋採北齊之法袞冕垂白珠十二
旒以組為纓色如其綬黻纁充耳玉笄太子庶子裴正
奏色並用玄

旒齊於膊
廣齊於耳

唯應著幘者依漢晉法皇太子

袞冕垂白珠九旒青纁充耳犀笄國公冕青珠九旒初
受冊命執贄入朝祭祀親迎三公助祭並服之侯伯則
鷩冕子男則毳冕五品以上絺冕九品以上爵弁唐依
周禮制天子之六冕有大裘冕袞冕鷩冕毳冕絺冕玄

冕大裘冕無旒廣八寸長一尺六寸

玄表纁裏以下廣狹准此

金飾

玉簪導

簪亦謂之筭所以拘冠使不墜也導以掠髮使入巾幘之中

以組為纓色如

其綬祀天地神祇服之衮冕

加金飾

垂白珠十有二旒以

組為纓色如其綬黼纁充耳玉簪導諸祭祀及享廟遣

上將征還飲至加元服元日受朝等服之鶩冕有事遠

主服之

按周禮遠主謂先公

毳冕祭海嶽服之絺冕祭社稷帝社

服之玄冕蜡百神朝日夕月服之自衮冕而下旒數並

依周禮皇太子衮冕白珠九旒諸臣衮冕青珠九旒青

續充耳簪導驚冕七旒第二品服之毳冕五旒第三品服之絺冕四旒第四品服之玄冕三旒第五品服之龍朔以後改更不同

緇布冠

一曰進賢冠周制士冠禮云緇布冠以為始冠之冠冠而敝之可也注云初加緇布冠次加皮

弁次加爵弁加皮弁後而棄之後漢制進賢冠為儒者之服前高七寸後高三寸長八寸公侯三梁中二千石以下至博士兩梁小吏私學弟子皆一梁蔡邕云千石以下一梁晉因之天子元服始加則冠五梁進賢冠三公及封郡公縣侯鄉亭侯則三梁卿大夫下至千石則兩梁中書門下至門郎小吏並一梁宋因之為儒冠齊因之為閒國公侯下至小吏之服其以梁數為降殺則依晉制梁因之以為乘輿宴會之服則五梁進賢冠陳

因之為文散內外百官所服以梁數為高卑天子所服則五梁北齊進賢五梁冠不通于下隋因陳制内外文官通服之降殺一如舊法唐因之若親王則加金附蟬為飾復依古制緇布冠為始冠之冠進賢緇布二制存焉

牟追冠

夏后氏牟追冠長七寸高四寸廣五寸後廣二寸制如覆杯前高廣後卑銳商因之制章甫冠

高四寸半後廣四寸前櫛首周因之制委貌冠司服云凡甸冠弁服甸田獵也漢制委貌以皂繒為之形如委穀之貌上小下大長七寸高四寸前高廣後卑銳無筭有纓行大射禮於辟雍諸公卿大夫行禮者冠之宋依漢制

通天冠

通天冠本秦制其狀不傳漢因秦名制高九寸正豎頂少斜却乃直下為鐵卷梁前有山展甬

為述甯駮犀簪導乘輿所常服晉依漢制前加金博山
述注云述即鵠也鵠知天雨故冠像馬前有展甯宋因
之又加黑介幘舊有冠無幘齊因之東昏侯改用玉簪
導梁因之復加冕於其上為平天冕陳因之北齊依之
乘輿釋奠所服隋因之加金博山附蟬十二首施珠翠
黑介幘玉簪導朔日元會冬朝會諸祭還則服之唐因
之其纓改以翠綵

長冠

漢高帝採楚制長冠形如板以竹為裏亦名齊冠
後以竹皮為之高七寸廣二寸以高帝所制曰劉

氏冠故為享廟之服恭之至也鄙人或謂之鵲尾冠晉
依之去竹用漆纚救日蝕諸祀則冠之梁天監中祠部
郎中沈宏議竹葉冠是漢祖微時所服不可為祭服宜
改用爵弁司馬槩云若必遵三王則所廢非一遂不改
遠游冠有具服遠游冠有公服遠游冠按遠游冠秦採
楚制楚莊王通梁組纓似通天冠而無山述有

展蒲橫之于前漢天子五梁太子三梁諸侯王通服之
晉皇太子及諸王後常冠馬以翠羽為綏綴以白珠帝
之兄弟之子封郡王者通服之則青絲為綏梁為皇太
子朝服加金博山翠綏陳因之其藻飾服用依晉故事
也北齊依之制五梁冠乘輿所服不通于下隋制三梁
加金附蟬九首施珠翠黑介幘翠綏犀簪導皇太子元
朔入朝釋奠則服之唐因之其制具開元禮序例

高山冠

秦滅齊獲其君冠以賜近臣因而制之形如通
天冠頂不斜却直植鐵為卷梁高九寸無山展

蒲故亦名側注冠其體側立而曲注故也中外謁者僕
射行人使者等所服漢舊儀云乘輿冠高山冠飛月之
纓一云飛翾之纓通天子之服也魏明帝以其制似通
天遠遊故改令卑下除去卷蒲如介幘幘上加物以象
山行人使者服之晉宋齊梁陳歷代因之隋因魏制參
用之形如進賢於冠加三峯謁者大夫以下服之梁數

依其品降殺唐因之內侍省內謁者監及親王司閣等服之

法冠

秦滅楚獲其君冠賜御史以纚為展甬鐵為柱梁一名柱後惠文冠執法者服之或謂之獬豸冠注

云獬豸神羊一角能別曲直楚王獲之以為冠漢晉至陳歷代相因襲不易隋開皇中於進賢冠上加二真珠為獬豸角形大業中改制一角注云獬豸神獸蓋一角今二角者非也執法者服之唐用一角為獬豸之形御史臺監察以上服之

建華冠

漢制以鐵為柱卷貫大銅珠九枚形似縷鹿薛綜曰下輪大上輪小也記曰知天者冠述知地

者履絢左氏傳曰鄭子臧好聚鵠冠建華是也祠天地五郊明堂舞人服之晉及陳代相因不易餘並無聞

趙惠文冠

一名武冠秦滅趙以其君冠賜近臣胡廣曰趙武靈王效胡服以金璫飾首前插貂尾為

貴職或以北土多寒胡人以貂皮溫額後代效之亦曰
惠文惠者螭也其冠文細如蟬翼故名惠文或曰齊人
見千歲涸澤之神名曰慶忌冠大冠乘小車好疾馳因
象其冠漢因之曰武弁一名大冠諸武官冠之侍中中
常侍加黃金璫附蟬為飾插以貂尾黃金為笄侍中插
左常侍插右貂用赤黑色又名鷄鷄冠倉頡解詁曰鷄
鷄驚即翟山雞之屬尾彩鮮明是將飾冠以代貂馬幸
臣閼孺為侍中皆服大冠天子元服亦為先加又加雙
鷄尾植左右名鷄冠鷄鷄鷄鳥之暴者每所攫撮應爪推
碎天子武騎故冠之徐廣曰鷄似黑野雞出上黨晉因
之名繁冠一名建冠一名龍冠即惠文冠也宋因之不
易齊因之侍臣加貂蟬餘軍校武職黃門散騎等皆冠
之唯武騎虎賁插鷄尾於武冠上梁因制遠遊平上幘
武冠陳因之不易後為鷄冠武者所服北齊依之曰武
弁季秋講武出征告廟則服之隋亦名武弁武職及侍
臣通服之侍臣加金璫附蟬以貂為飾侍左者左珥侍

右者右珥天子則金博山三公以上玉枝四品以上金枝文官七品以上既白筆八品以上及武官皆不珥筆唐因之乘輿加金附蟬平巾幘侍中中書令則加貂蟬侍左右珥諸武官府衛領軍九品以上等亦准此

方山冠

漢制似進賢冠以五采縠為之祠宗廟八佾四時五行樂人服之冠衣各如其方之色而舞馬

晉因之

巧士冠

漢制高七寸要後相通直植似高山冠不常服唯郊天黃門從官者四人冠之在鹵簿中次乘

輿車前以備宦者四星云晉因之自後無聞

却非冠

漢制似長冠皆縮垂五寸有纓綈宮殿門吏僕射等冠之梁北郊圖執事者縮纓綈隋依之門

者禁防伺非服也唐因之亭長門僕服之

樊噲冠

漢將樊噲造次所冠以入項羽軍其制似平冕廣九寸高七寸前後各四寸殿門司馬衛士服

之或曰樊噲常持鐵楯間項羽有意殺漢王噲裂裳以裹楯冠之入軍門立漢王傍視項羽晉宋齊陳不易其制餘並

無間

術氏冠

漢制前圓差池四重趙武靈王好服之今不以施用或曰楚莊王獬冠是也晉因之宋以後無

間

却敵冠

晉制前高四寸通長四寸後高三寸似進賢冠凡當殿門衛士服之陳因之餘並廢

翼善冠

唐貞觀中制月一日十五日視朝常服之又與平巾幘通用太宗初服翼善冠賜貴臣進德冠

因謂侍臣曰幘頭起於周武帝蓋取便於軍容耳今四海無虞此冠頗採古法兼類幘頭乃宜便服開元十七

年廢
不用

皇

有虞氏皇而祭其制無文蓋爵弁之類夏后氏因之曰收純黑前小後大商因之曰冔黑而微白前大後

小周因制爵弁爵弁冕之次也赤而微黑如爵頭然前小後大三代以來皆廣八寸長尺二寸如冕無旒皆三十升布為之士冠禮三加成人服之漢依周制或云中古以下其制用絲祠天地五郊明堂雲翹樂舞服之晉依漢制更名廣冕有收持筭服用如舊隋依之以角為簪導士助君祭服之唐因之以繒代布用元纓簪導九品以上冠親迎助祭私家祭祀服之

皮弁

周禮弁師云王之皮弁會五采玉璆象邸玉筭司服云視朝則皮弁服士冠禮曰三王共皮弁以鹿

皮為之晉依舊制以鹿淺毛黃白色者為之其服用等級並准周官後周田獵則服之以鹿子皮為之隋因之

大業中所造通用烏漆紗前後二傍如蓮葉四間空處
又安拳花頂上當縫安金梁梁上加璫天子十二真珠
為之皇太子及一品九璫二品八璫下六品各殺其一
璫以玉為之皆犀簪導六品以下無璫皆象簪導唯天
子乃用金校後制鹿皮者以賜近臣唐因之
以鹿皮為之玉簪導十二璫朔日受朝服之

韋弁

周官司服云凡兵事韋弁服晉以韋為之頂上少
尖宋因之或為車駕親戎中外戒嚴之服後周巡

兵即戎則服之自此
以來無復其制

幘

古者有冠無幘其戴也加首有頰所以安物故詩曰
有頰者弁此之謂也秦雄諸侯乃加其武將首為絳

帟以表貴賤其後稍稍作顏題相音育百切漢因續其
顏却探之施巾連題却覆之至孝文乃高其顏題續之
為耳崇其中為屋貴賤皆服之文者長耳謂之介幘武
者短耳謂之平上幘稱其冠也尚書幘收三寸名曰納

言亦以忠正明近職也迎氣五郊各如其色從章服也
武吏常赤幘成其威也未冠童子幘無屋者示未成人
也未入學小童幘勾卷屋者示尚幼小未遠冒也喪幘
却搥反本禮也制紺幘以齋青幘以耕紺幘以獵晉因
之東晉哀帝從博士曹洪等議立秋御讀月令改用素
幘宋因之以黑幘騎吏鼓吹武官服之其敕日蝕文武
官皆冕冠著赤幘齊因之以黑幘拜陵所服梁因之以
黑介幘為朝服元正朝賀畢還儲更出所服未加元服
則空頂幘陳因之諸軍司馬服平巾幘長吏介幘黃鉞
郎朝服赤介幘簪筆隋依之天子田獵御戎文官出遊
田里武官自一品以下至九品並流外吏等上下通服
黑介幘平巾黑幘又制綠幘庖人服之其平巾黑幘之
制玉枝金花飾犀簪導紫羅褶其御五輅人隨其車色
唐因制乘輿空頂介黑幘雙玉導加寶飾祭還及冬至
朔日受朝會臨軒拜王公則服之黑介幘拜陵則服之
平巾幘金寶飾導簪冠支皆以玉乘馬則服之皇太子

平巾幘乘馬則服之空頂介幘雙王導加寶飾謁廟還宮元日冬至朔日入朝釋奠則服之冠幘五品以上陪祭服之

臣謹按蔡邕獨斷曰幘古之卑賤執事不冠者所服也漢元帝額有壯髮不欲使人見始進幘服之羣臣皆隨焉然尚無巾王莽頂禿幘上施屋壯髮謂當額前侵下而生者是

幅魏武以天下凶荒資財乏匱擬古皮弁裁縑皂以為幅苦治反幅合乎簡易隨時之義以色別其貴賤本施軍飾非為國容或云本末有岐荀文若巾之行觸木枝成岐因之為名遂不改因通以慶弔幅與恰同音因

之咸和中制聽尚書八座丞郎門下三侍官乘車白帽
齊依以素為之舉哀臨喪服之梁因之以代古疑練為
弔服羣臣舉哀臨喪則服之陳因之而初

帽

帽野人之服也董巴云上古穴居野處衣毛帽皮以
此而言不施衣冠明矣周成王問周公曰舜之冠何

如馬曰古之人上有帽而勾額魏管寧在家常著帛帽
晉因魏制宋制黑帽綴紫標標以繒為之長四寸廣一
寸後制高屋白紗帽齊因之梁因之制頗同至於高下
翅之卷小異耳皆以白紗為之陳因之天子及士人通
冠之白紗者名高頂帽皇太子在上省則烏紗帽在永
福省則白紗又有皂繒雜紗為之高屋下裙蓋無定準
後周之時咸著突騎帽如今胡帽垂裙覆帶蓋索髮之
遺像也又文帝項上瘤疾不欲人見每常著烏相魏之
時著而謁帝故後周一代以為雅服小朝公宴咸許戴
之隋開皇初文帝常著烏紗帽自朝貴已下至于冗吏

通著入朝後復制白紗高屋帽其服練裙襦烏皮履宴
接賓客則服之大業中令五品以上通服朱紫是以烏
紗帽漸廢貴賤通服折上巾唐因之制白紗
帽又制為紗帽視朝聽訟宴見賓客服之

臣謹按元中記云旬始作帽晉志云帽名猶冠也義
取於蒙覆其首本纚也古者冠無幘冠下有纚以繒
為之後世施幘於冠因或裁纚為帽自乘輿宴居下
至庶人無爵者皆得服之又按吳書云陸遜破曹休
於石亭還當反西陵朝臣燕賜終日上脫裙帽以賜
遜時同羣臣朝謁而服之又按後漢郭林宗行遇雨

霑巾角折後周武帝建德中因制折上巾

葛巾

東晉制以葛為之形如恰而橫著之為尊卑共服太元中國子生見祭酒博士冠角巾齊休之陳休

之北齊依之

自後無聞

臣謹按角巾之制宋不存至齊立學王儉議更存焉

幅巾

後漢末王公名士以幅巾為雅是以袁紹崔豹之徒雖為將帥皆著縑巾時有妖賊以黃為巾時號

黃巾賊後周武帝因裁幅巾為四脚唐因之

臣謹按方言云巾趙魏之間通謂之承露郭林宗折

巾謂此也袁紹戰敗幅巾渡河按此則庶人及軍旅

皆服之用全幅帛而向後襍髮謂之頭巾俗人謂之

襍頭

巾子

唐武德初始用之初尚平頭小樣者天授二年武太后內宴賜羣臣高頭巾子呼為武家諸王樣景

龍四年三月中宗內宴賜宰臣以下內樣巾子其樣高而踏皇帝在藩時所冠人號為英王踏樣

君臣服章制度

袍附

虞書曰予欲觀古人之象日月星辰山龍華蟲作會宗

彝藻火粉米黼黻絺繡備十二章

衣元裳黃上六章在衣下六章在裳上畫

下夏商之世皆相襲而無變周官司服掌王之吉凶衣

服大裘以祀天

大裘黑羔裘示質也

衮冕之服享先王

升日月於旌旗服備

九章一曰龍二曰山三曰華蟲四曰火五曰宗彝皆畫以為績六曰藻七曰粉米八曰黼九曰黻皆紵以為繡

則衮之衣五章裳四章凡九

鷩冕之服享先公

鷩畫雉謂華蟲其衣三章裳四章凡七

毳冕之服祀四望山川

毳畫虎雉謂宗彝也其衣三章裳二章凡五

絺冕之

服祭社稷五祀

絺刺粉米無畫其衣一章裳二章凡三

元冕之服祭羣小

祀

其衣無文裳刺黻而已凡冕服皆玄衣纁裳

凡兵事韋弁服

以韠韋為弁又以為衣裳

春秋傳曰晉郤至衣韠韋之跗注者是也

眡朝則皮弁服

視內外朝之事其服十五升白布衣

積素以為裳王受諸侯朝覲於廟則衮冕

凡甸冠弁服

甸田獵也冠弁委貌其服緇布衣亦積素

以爲

公之服自衮冕而下如王之服侯伯之服自鷩冕

而下如公之服子男之服自毳冕而下如侯伯之服孤

之服自絺冕而下如子男之服卿大夫之服自元冕而

下如孤之服士之服自皮弁而下如大夫之服其齋服

有元端素端

自公之衮冕至卿大夫之元冕皆其朝聘天子及助祭之服諸侯非二王之後其餘

皆元冕而祭於己雜記曰大夫冕而祭於公弁而祭於己士弁而祭於公冠而祭於己大夫爵弁自祭家廟唯孤爾其餘皆元冠與士同元冠

秦制水德服尚杓黑

杓音

自祭其廟者其服朝服元端

均後漢光武踐阼始修郊祀天子冕服從歐陽氏說三

公九卿特進朝侯侍祠侯從夏侯氏說祀天地明堂皆冠旒冕衣裳皆元上纁下一服而已明帝永平中議乘輿備文日月十二章刺繡文三公諸侯用山龍九章九卿以下用華蟲七章皆備五采大佩赤舄絢履以承大祭百官執事者冠長冠皆祗服五嶽四瀆山川宗廟社稷諸沾秩祠皆衲元絳緣領袖為中衣絳袴襪示其赤心奉神也其五郊迎氣衣幘袴襪各如方色云百官不執事者各服長冠衲元以從大射禮於辟雍公卿諸侯

大夫行禮者冠委貌衣元端素裳

鄭玄曰端取其正也鄭衆曰衣有襦裳者

為端執事者冠布弁衣緇麻衣皂領袖下素裳若冠通天

冠服衣深衣制有袍隨五時色

梁劉昭曰袍者或曰周公抱成王宴居故施袍

孔子衣縫掖之衣縫掖其袖合而縫大之近今袍者也今下至賤夫小吏皆通制袍單衣皂緣領袖中衣為朝服魏氏多因漢法其所損益之制無聞

按後漢志孝明皇帝永平二年

詔從歐陽夏侯二家所說制冕服乘輿刺繡文公卿以下織成文據晉志云魏明帝以公卿衮黼之服擬於至尊多所減損始制服刺繡公卿織成未詳孰是晉因不改大祭祀衣皂上絳下

裳前三幅後四幅衣畫而裳繡日月星辰凡十有二章

素帶廣四寸朱裏以朱緣裨飾其側中衣以絳緣領赤皮為韞絳袴韞赤烏未加元服則皂紗袍絳緣中衣絳袴韞黑烏又朝服通天冠絳紗袍皂緣中衣拜陵則淺單衣雜服有青赤黃白黑五色紗袍其武弁素服單衣公卿助祭郊廟王公山龍以下九章卿華蟲以下七章其緇布冠衣黑而裳素中衣以皂緣領袖袴褶之制未詳所起其後車駕親戎中外戒嚴服無定色冠黑帽綴黑標以繒為之長四尺廣一寸腰有絡帶以代鞶革中

官紫標外官絳標又有纂嚴戎服而不綴標行留文武
悉同宋因之制平天冕服不易舊法更名韞曰蔽膝其
未加元服釋奠先聖視朝拜陵等服及雜色紗裙武冠
素服並沿舊不改王公助祭郊廟章服降殺亦如之袴
褶因晉不易腰有絡帶以代鞶革中官紫標外官絳標
又有纂嚴戎服而不綴標行留文武悉同其田獵巡幸
惟從官戎服帶鞶革文帝元嘉中巡幸蒐狩救廟水火
皆如之明帝太始四年詔曰近改定令脩成六服朕以

大冕純玉璫元衣黃裳祀天宗祀明堂又以法冕元衣
絳裳祀太廟元正大會朝諸侯又以飾冕紫衣紅裳小
會宴饗送諸侯臨軒會王公又以繡冕朱衣裳征伐講
武校獵又以紘冕青衣裳耕稼饗國子又以通天冠朱
紗袍為聽政之服泰始六年正月有司奏被勅議皇太
子正冬服袞冕九章以朝賀詔可齊因制平天冠服不
易舊法郊廟臨朝所服也舊袞服用織成建武中明帝
以織太重乃采畫為之加金飾銀薄時亦謂為天衣通

天冠服絳紗袍皂緣中衣乘輿臨朝所服臣下皆同拜
陵則黑介幘服無定色舉哀臨喪白帟單衣亦謂之素
服王公助祭平冕服山龍以下九章卿七章皆畫皂絳
繒為之袴褶相因不改梁因制平天冠服衣畫而裳繡
十二章素帶朱裏以朱緣裨飾其側更名赤韎為韠餘
因舊法又有通天冠服絳紗袍皂緣中衣黑舄是為朝
服元正賀畢還儲更衣出所服也釋奠先聖則皂紗袍
絳緣中衣絳袴韎黑舄拜陵則芻布單衣又有白帟單

衣以代古之疑縗天監三年何佟之議公卿以祭服裏
有中衣即今中單也後漢從夏侯氏說祭服絳緣領袖
為中衣絳袴韞示其赤心奉神也今中衣絳緣足有所
明無俟於袴既非聖法謂不可施遂依議除之七年周
捨議按禮有虞氏皇而祭深衣而養老鄭玄云皇是畫
鳳羽也今衮衣宜畫鳳以示差降帝曰古文日月星辰
此以一辰攝三物也山龍華蟲又以一山攝三物也藻
火粉米又以一藻攝三物也是為九章今衮衣畫龍則

宜畫鳳又五經博士陸瑋等議王者祀昊天服大裘鄭
玄注司服云大裘黑羔裘也既無所出未為可據按六
冕之服皆元上纁下今宜以繒為之其制式如裘其裳
以纁皆無文繡詔可九年司馬筠等議云按玉藻諸侯
元冕以祭裨冕以朝雜記又云大夫冕而祭於公弁而
祭於己今之尚書上異公侯下非卿士止有朝衣本無
冕服既從齋祭不容同於在朝宜依太常及博士諸齋
官例著白衣絳襪中單竹葉冠陳因之永定元年武帝

即位徐陵曰乘輿御服皆採梁制帝曰今天下初定務從節儉應用繡織成者並可彩畫至文帝天嘉初悉改易之後魏天興六年詔有司始制冠冕各依品秩以示等差然自晉左遷中原禮儀多缺未能皆得舊制至太和中方考故實正定前繆更造衣冠尚不能周洽及熙平二年太傅清河王懌黃門侍郎韋延詳等奏定五時朝服准漢故事五郊衣幘各如方色焉北齊因之河清中改易舊物著為定制云後周設司服之官掌皇帝十

二服祀昊天上帝則蒼衣蒼冕五方上帝各隨方色朝

日用青衣青冕祭皇地祇用黃衣黃冕夕月用素衣素

冕神州社稷用元衣元冕享先皇加元服納后朝諸侯

則用十二章之服享諸先帝食三老五更享諸侯耕藉

則用龍以下九章之服祀星辰祭四望視朔大射饗羣

臣等則用山冕八章之服羣祀視朝臨太學入道法門

燕射養庶老適諸侯家則用鷩冕七章之服其九章以

下衣重衮山鷩裳重黼黻俱十有二等通以升龍為領

標巡兵即戎則韎韁以為衣裳田獵則皮弁

謂以鹿子皮為弁

白布衣而素裳也諸公之服九章服之章數皆隨冕而降其一其八章以下衣重藻粉米裳重黼黻俱九等皆以山為領標諸侯服八章而下俱八等皆以華蟲為領標諸伯服七章而下俱七等皆以火為領標諸子服六章俱六等皆以宗彝為領標諸男服五章皆以藻為領標三公之服有九章有六衣重宗彝與藻裳重黼黻俱為九等皆以宗彝為領標三孤之服有八章有五衣重

藻與粉米裳重黼黻俱為八等公卿之服有七章有四
衣重粉米裳重黼黻為七等皆以藻火為領標上大夫
之服有六章有三衣重粉米裳重黼黻為六等中大夫
之服有五章有三衣重粉米為五等下大夫之服有四
章有三衣重粉米為四等士之服三則祀弁爵弁元冠
服皆元衣其裳上士以元中士以黃下士雜裳謂前元
後黃
庶士元冠服其在官府吏之屬服緇衣裳隋文帝即位
將改後周制度乃下詔曰宣尼制法損益可知朕受天

命赤雀來儀五德相生宜為火色其郊丘廟社可依袞
冕之儀朝會衣裳宜盡用赤昔丹烏木運周有大帛之
旗黃星土德曹乘黑首之馬今之戎服皆可尚黃在外
所著者通用雜色祭祀之服須合禮經宜集通儒更可
詳議太子庶子攝太常少卿裴正奏曰後魏以來法度
咸闕天興草創多參胡制周氏因襲不可以訓今採東
齊之法乘輿袞冕元衣纁裳衣山龍華蟲火宗彝五章
裳藻粉米黼黻四章衣重宗彝裳重黼黻為十二等衣

標領織成升龍白紗內單黼黻領青標褱裾革帶玉鈎
髀大帶素帶朱裏紕其外上以朱下以綠韍隨裳色龍
火山三章轆轤玉具劔火珠鏢首白玉雙珮元組雙大
綬六采元黃赤白縹綠純元質長二丈四尺五百首廣
一尺小雙綬長二丈六寸色同大綬而首半之間施三
玉環朱韍赤舄舄加金飾祀圓丘方澤五帝明堂五郊
雩禘封禪朝日夕月宗廟社稷藉田遣上將征還飲至
元服納后正月受朝及臨軒拜王公則服之通天冠加

金博山附蟬十二首施珠翠黑介幘玉簪導絳紗袍深
衣制白紗內單皂領標襪裾絳紗蔽膝白假帶方心曲
領其革帶劍珮綬舄與上同黑介幘白紗單衣烏皮履
拜陵則服之白紗帽白練裙襦烏皮履視朝聽訟及宴
見賓客皆服之白帟白紗單衣烏皮履舉哀則服之皇
太子袞冕元衣纁裳衣山龍華蟲火宗彝五章裳藻黼
黻粉米四章織成為之白紗內單黼領青標襪裾革帶
金鈎鞬大帶素帶不朱裏亦紕以朱綠鞞隨裳色火山

二章玉具劔火珠鏢首瑜玉雙佩朱組雙大綬四采赤
白標紺純朱質長丈八尺三百二十首廣九寸小雙綬
長二尺六寸色同大綬而首半之間施二玉環朱韞赤
舄舄以金飾侍從皇帝祭祀及謁廟加元服納妃則服
之遠遊三梁冠加金附蟬九首施珠翠黑介幘犀簪導
絳紗袍白紗內單皂領標襪裾白假帶方心曲領絳紗
蔽膝韞舄其革帶劔珮綬與上同謁廟還宮元日朔日
入朝釋奠則服之遠遊冠公服絳紗單衣革帶金鈎鞬

假帶方心紛長六尺四寸廣二寸四分色同其綬金縷
鞶囊鞶履五日常朝則服之袞冕服九章同皇太子王
國公開國公初受冊執贄入朝祭祀親迎則服之三公
助祭者亦服之鷩冕服七章衣華蟲火宗彝三章裳藻
粉米黼黻四章侯伯初受冊執贄入朝祭祀親迎則服
之毳冕五章衣宗彝藻粉米三章裳黼黻二章子男初
受冊執贄入朝祭祀親迎則服之絺冕服三章正三品
以下從五品以上助祭則服之自王公以下服章皆繡

為之祭服冕皆簪導青纁充耳元衣纁裳白紗內單黼

頌

絺冕以下
內單青領

青標襪裾革帶鈎鑠大帶

王三公及公侯
伯子男素帶不

朱裏皆紕其外上以朱下以綠正三品以下從五
品以上素帶紕其垂外以元內以黃鈎皆用青組

朱韍

凡韍皆隨裳色衮鷩毳
火山二章絺山一章

劍佩綬韍赤舄爵弁從九品以

上助祭則服之元衣纁裳無章白絹內單青領標襪裾

革帶大帶武弁平巾幘諸武職及侍臣通服之侍臣加

金璫附蟬以貂為飾侍左者左珥侍右者右珥委貌冠

未冠則雙童髻空頂黑介幘皆深衣青領烏皮履國子

太學四門生服之朝服

亦名具服

絳紗單衣白紗內單皂領

袖皂襪革帶鉤鰓假帶曲領方心絳紗蔽膝韞舄綬劍

珮從五品以上陪祭朝饗拜表凡大事則服之六品以

下從七品以上去劍珮綬餘並同自餘公事皆從公服

亦名從省服

唐制天子衣服有大裘衮冕鷩冕毳冕絺冕元

冕通天冠武弁黑介幘白紗帽平巾幘白帟凡十二等

貞觀四年制三品以上服紫四品五品以上服緋六品

七品以上服綠八品九品以上服青婦人從夫之色仍通服

黃

后妃命婦首飾制度

周制追師掌王后之首服為副編次追衡筭為九嬪及

外內命婦之首服以待祭祀賓客

鄭元謂副之言覆所以覆首為之飾其遺

象若今步搖編編髮為之其遺象若今假紒矣次第髮長短為之所謂髮髻也追猶治也王后之衡筭皆以玉為之唯祭服有衡垂于副之兩旁當耳其下以紃垂瑱笄卷髮者漢制太皇太后皇太

后入廟翦釐齒簪珥

珥耳璫垂珠也

簪以瑇瑁為擗長一尺端

為華勝上為鳳皇爵以翡翠為毛羽下有白珠垂黃金

鑷左右一橫簪之以安齒諸簪珥皆同制其摘有等級

馬皇后謁廟假髻步搖俗謂之珠松是也簪珥步搖以

黃金為山題貫白珠為枝相繆八爵九華熊虎赤羅天

鹿辟邪南山豐大特六獸詩所謂副笄六珈

珈笄飾之最盛者所

以別尊卑者也南山豐大特按史記秦文公二十七年代南山大梓豐大特徐廣注云今武都故道有怒特祠圖大牛上生木本有牛從木中出後見於豐水中諸爵獸皆以翡翠為毛羽金

題白珠璫繞以翡翠為華云貴人助蠶大手髻黑瑇瑁

又加簪珥長公主加步搖公主大手髻皆有簪珥公卿

列侯中二千石二千石夫人紺繒黃金龍首銜白珠

魚須臈長一尺為簪珥魏制貴人夫人以下助蠶皆大

手髻七鎮

音奠

蔽髻黑瑇瑁又加簪珥九嬪以下五鎮世

婦三鎮諸王妃長公主大手髻七鎮蔽髻其長公主得

有步搖皆有簪珥公特進列侯卿校世婦以下夫人紺

繒黃金龍首銜白珠魚須臈長一尺為簪珥晉依前

代皇后首飾則髻步搖簪珥步搖以黃金為山題貫白

珠為枝相繆八爵九華熊虎赤羆天鹿辟邪南山豐大

特六獸諸爵獸皆以翡翠為毛羽金題白珠璫繞以翡翠為華宋依漢制太后入廟祭祀首飾翦髻繒皇后親蠶首飾假髻步搖八雀九華加以翡翠復依晉法皇后十二鎮步搖大手髻公主會見三夫人大手髻七鎮蔽髻公夫人五鎮世婦三鎮其長公主得有步搖公特進列侯夫人二千石命婦年長者紺繒繒齊因之公主會見大手髻不易舊法陳依前制皇后謁廟首飾假髻步搖簪珥步搖以黃金為山題貫白珠為枝相繆八爵九

華熊虎赤羆天鹿辟邪南山豐大特六獸諸爵獸皆以
翡翠為華開國公侯太夫人夫人大手髻七鎮蔽髻九
嬪及公夫人五鎮世婦三鎮其長公主得有步搖公特
進列侯卿校中二千石夫人紺繒繒黃金龍首銜白珠
魚須摘長一尺為簪珥後魏天興六年詔有司始制冠
冕各依品秩以示等差然未能皆得舊法北齊依前制
皇后首飾假髻步搖十二鎮八爵九華內命婦以上蔽
髻唯以鎮數花釵多少為品秩二品以上金玉飾三品

以下金飾內命婦左右昭儀三夫人視一品假髻九鑲
三品五鑲蔽髻四品三鑲五品一鑲又有宮人女官第
二品七鑲蔽髻三品五鑲四品三鑲五品一鑲七品大
手髻八品偏髻髻皇太子妃假髻步搖九鑲郡長公主
七鑲蔽髻太子良娣視九嬪女侍中五鑲內外命婦宮
人女官從蠶則各依品次還著蔽髻後周制皇后首飾
花釵十有二樹諸侯之夫人亦皆以命數為之節三妃
三公夫人以下又各依其命一命再命者又俱以三為

節隋因之皇后首飾花十二樹皇太子妃公主王妃三
師三公夫人一品命婦並九樹侯夫人二品命婦並八
樹伯夫人三品命婦並七樹子夫人世婦及皇太子昭
訓四品以上命婦並六樹男夫人五品命婦並五樹女
御及皇太子良娣三樹自皇后以下小花並如大花之形唐武德中制
令皇后褱衣首飾花釵十二樹餘各有差開元中又定
品令

后妃命婦服章制度

周制內司服掌王后之六服褱衣揄翟闕翟鞠衣展衣

祿衣素紗

王后之服刻繒為之形而采畫之綴於衣以文章褱衣畫翟者揄翟畫搖者闕翟刻而

不畫此三者皆祭服從王祭先王則服褱衣祭先公則服揄翟祭羣小祀則服闕翟今世有袿衣者蓋三翟之遺俗鞠衣黃桑服也色如麴塵象桑葉始生月令三月為鞠衣于上帝告桑事展當為禋禋衣以禮見王及賓客之服其色白祿衣御於王之服亦以燕居其色黑六服備於此矣以下推次其色則闕翟赤揄翟青褱衣元此鄭據五行相生為說也素紗者今之白縛也六服皆袍制以白縛為裏使之張顯今世有沙縠者名出於此其翟多少各依命數揄音搖縛音絹

辨內外命婦之服鞠衣展衣祿衣素

紗內命婦之服鞠衣九嬪也展衣世婦也祿衣女御也外命婦者其夫孤也則服鞠衣其夫卿大夫也則服

展衣其夫士也則服祿衣三夫人及公之妻並闕翟以下至侯伯之夫人揄翟子男之夫人亦闕翟唯二王後也

韋衣

漢制太皇太后皇太后皇后入廟服紺上皂下蠶

服青上縹下皆深衣制

徐廣曰即單衣也縹音足繞反

隱領袖緣以條

貴人助蠶服純縹上下長公主見會自公主封君以上

皆帶綬以采組為緄帶各如其綬色黃金辟邪首為帶

鐻飾以白珠公卿列侯中二千石夫人入廟佐祭者服

皂絹上下助蠶者縹絹上下自二千石夫人以上至皇

后皆以蠶衣為朝服公主貴人妃以上嫁娶則服錦綺

羅縠繒采十二色重祿袍特進列侯以上錦繒采十二色六百石以上重練采九色禁丹紫紺三百石以上五采青絳黃紅綠二百石以上四采青黃紅綠賈人紵縹而已

紵赤黃色

魏之服制不依古法多以文繡晉依前漢制

皇后謁廟服皂上縹下隱領袖緣元康六年詔以純青服貴人夫人貴嬪是為三夫人皆金章紫綬九嬪銀印青綬佩采璫玉助蠶之服純縹為上下皇太子妃金璽龜鈕纁朱綬佩瑜玉諸王太妃諸長公主金印紫綬佩

山玄玉自公主以上皆帶綬以綵組為緄帶各如其綬

色金辟邪首為帶玦郡縣公侯夫人銀印青綬水蒼玉

公特進列卿世婦中二千石夫人入廟助祭者皂絹上

下助蠶者緇絹上下自二千石以上至皇后皆以蠶衣

為朝服宋制太后皇后入廟服袿褕

上圭下屬

大衣謂之褱

衣公主會見封君以上皆帶綬以采為緄帶各如綬色

公特進列侯夫人卿校世婦二千石命婦年長者入廟

佐祭皂絹上下助蠶則青絹上下自皇后至二千石命

婦皆以蠶衣為朝服

按漢劉向曰古者天子至於士王后至於命婦必佩玉尊卑各有其

制皇后至命婦所佩玉古制不存今與外同制

齊因之袿襦用繡為衣裳黃綬

貴嬪夫人貴人王太妃長公主封君皆紫綬六宮郡公
侯夫人青綬陳依前制皇后謁廟袿襦大衣皂上皂下
親蠶則青上縹下隱領袖緣貴妃嬪金章龜鈕紫綬佩
于闐玉獸頭鞶九嬪以下章綬佩帶各有差自公主封
君以上皆帶綬以綵組為緄帶各以其綬色金辟邪首
為帶玦自二千石以上至皇后皆以蠶衣為朝服北齊

皇后助祭朝會以褱衣祠郊禘以揄翟小宴以闕翟親
蠶以鞠衣禮見皇帝以展衣宴居以褱衣六服俱有蔽
膝織成組帶內外命婦從五品以上金章紫綬服揄翟
雙佩山玄玉九嬪視三品銀章青綬鞠衣佩水蒼玉其
餘各有差餘與女侍中同外命婦皆如其夫若夫假章
印綬佩妻則不假一品二品服闕翟三品服鞠衣四品
展衣五品褱衣內外命婦宮人從蠶則各依品次皆服
青紗公服其外命婦綬帶鞶囊皆准其夫公服之例百

官之母詔加太夫人者朝服公服各與其命婦服同後

周制皇后之服十有二等其翟衣六從皇帝祀郊禘享

先皇朝皇太后則服翟衣祭陰社朝命婦則服揄衣祭

羣小祀受獻繭則服鷩衣採桑則服鳴衣

黃色音卜

從皇帝

見賓客聽女教則服鵠衣

白色音罩

食命婦歸寧則服翬衣

元色音秩

俱十有二等以翟翟為領標各有二臨婦學及法

道門燕命婦則蒼衣春齋及祭還則青衣夏齋及祭還

則朱衣採桑齋及祭還則黃衣秋齋及祭還則素衣冬

齋及祭還則元衣自青而下其標領以相生之色諸公
夫人自揄衣以下驚鴻鶉羽朱黃素元等衣而九諸侯
夫人自驚衣而下八諸伯夫人自鴻衣而下七諸子夫
人自鶉衣而下六諸男夫人自羽衣而下五其翟衣翟
皆依其等數而領標各有差三妃三公夫人之服九鴻
衣鶉衣羽衣青衣朱衣黃衣素衣元衣綃衣其翟亦九
等以鴻翟為領標各九三孤之內子自鶉衣而下八翟
皆八等以鶉翟為領標各八九嬪六卿之內子自羽衣

而下七翟皆七等以翎翟為領標各七上媛上大夫之孺人自青衣而下六中媛中大夫之孺人自黃衣而下四御婉士之婦自素衣而下三中宮六尚緌

子侯反

衣諸

命秩之服曰公服其餘常服曰私衣隋制皇后褱衣鞠衣青衣朱衣四等褱衣深青質織成領袖文以翟翟五采重行十二等素紗內單黼領羅縠標褱色皆以朱蔽膝隨裳色以緌為緣用翟三章大帶隨衣裳飾以朱緣之革帶青鞵烏烏以金飾白玉佩元組綬章采尺寸同

於乘輿祭及朝會大事服之鞠衣黃羅為質織成領袖
蔽膝革帶及舄隨衣色餘准褱衣親蠶服也青衣去大
帶及珮綬金飾履禮見天子則服之朱服如青服有金
璽盤螭鈕文曰皇后之璽冬至大朝則并璜琮各以筭
貯進於座隅皇太后同於后服而貴妃以下並亦給印
三妃服揄翟金章龜鈕文從其職紫綬金縷獸頭鞶囊
佩于闐玉九嬪服闕翟金章龜鈕文從其職佩采璫玉
婕妤銀縷織成他如嬪服美人才人鞠衣銀印珪鈕獸

爪鞞囊佩水蒼玉寶林服展衣艾綬鞞囊珮玉同婕妤
承衣刀人采女皆祿衣無印綬皇太子妃服褕翟衣九
章金璽龜鈕素紗內單黼領羅襪襪色皆用朱蔽膝二
章大帶同褱衣青緣革帶朱鞵青舄舄加金飾珮瑜玉
纁朱綬獸頭鞞囊凡大禮見皆服之唯侍親桑則用鞠
衣珮綬與褕衣同良娣鞠衣銀印青綬獸爪鞞囊餘同
世婦寶林八子展衣銅印佩水蒼玉艾綬諸王太妃妃
長公主三公夫人一品命婦褕翟繡為九章佩山玄玉

獸頭鞶囊綬同夫色公夫人縣主二品命婦亦揄翟繡
八章從親桑同鞠衣自此以下佩皆水蒼玉侯伯夫人
三品命婦亦服揄翟繡為七章子夫人四品命婦服闕
翟刻赤繒為翟綬衣上為六章男夫人五品命婦闕翟
五章若從親蠶皆同鞠衣唐武德令皇后服有褱衣鞠
衣鈿釵褱衣三等皇太子妃揄翟鞠衣自皇后至內外
命婦衣服制度並具開元禮

天子諸侯玉佩劔綬璽印

周制天子佩白玉而玄組綬公侯佩山玄玉而朱組綬

大夫佩水蒼玉而緇組綬世子佩瑜玉而綦組綬士佩

璫玕而緇組綬

綬者所以貫佩玉綦文雜色緇赤黃色

王鎮圭長尺有二

寸大圭長三尺杼上終葵首

終葵椎也為杼於其杼上杼殺也

繅藉五

采五就以朝日公執桓圭九寸侯執信圭伯執躬圭皆

七寸繅皆三采三就子執穀璧男執蒲璧繅皆二采再

就以朝覲宗遇會同于王

三采朱白蒼二采朱綠也

凡玉天子用全

上公用龍侯用瓚伯用將

龍瓚將皆雜名

自五霸迭興戰兵不

息佩非戰器韍非兵旗於是解去綬佩留其係璽以為
章表韍佩遂廢又三代之制人臣皆以金玉為印龍虎
劔唯所好也秦始制璽以玉不通臣下用制乘輿六璽
曰皇帝行璽皇帝之璽皇帝信璽天子行璽天子之璽
天子信璽又始皇得藍田白玉為璽螭虎鈕文曰受天
之命皇帝壽昌韍佩既廢乃以采組連結於璽光明章
表轉相結受故謂之綬漢高帝入關得秦始皇白玉璽
佩之曰傳國璽與斬蛇劔俱為乘輿之寶韍承秦制用

而弗改加之以雙印佩刀後漢孝明帝乃為大佩衝牙

雙瑠璜皆以白玉

月令章句曰佩上有雙珩下有雙璜瑠璜以雜之衝牙蟬珠以納其間纂

要曰瑠璜所以納珠在玉之間今白珠也

乘輿落以白珠公卿諸侯以采絲

其視冕旒為祭服云佩刀乘輿黃金通身貂錯半鮫魚

鱗金漆錯雌黃室五色罽隱華室諸侯王黃金錯環挾

半鮫黑室公卿百官皆淳黑不半鮫小黃門雌黃室中

黃門朱室童子皆虎爪文虎賁黃室虎文其將白虎文

皆以白珠為鑢口之飾

刀鋒曰鑢匹燒反

乘輿者加翡翠山紆

嬰其側佩雙印長寸二分方六分乘輿諸侯王公列侯以白玉中二千石以下至四百石皆以黑犀三百石以至私學弟子皆以象牙上合絲乘輿以滕貫白珠赤罽毼諸侯王以下繇口故反赤絲毼滕繇各如其印質刻書

文曰正月剛卯既決靈爰四方赤青白黃四色是當帝令祝融以教夔龍庶疫剛痺莫我敢當疾日嚴卯帝令夔龍慎爾周伏化茲靈爰既決既直既觚既方庶疫剛痺莫我敢當

前漢注云以正月卯日作

乘輿黃赤綬四采黃赤紺縹

淳黃圭長丈九尺九寸五百首

凡綬先合單紡為一絲四系為一扶五扶為一

首五首成一文采純為一圭首多者系細首少者系麤漢官儀曰璽皆白玉螭虎鈕文曰皇帝行璽皇帝之璽皇帝信璽天子行璽天子之璽天子信璽凡六璽皇帝行璽封常行詔勅之璽賜諸侯王書信璽發兵召大臣天子行璽策拜外國事之璽賜外國書信璽發外國兵及事天地鬼神璽皆以武都紫泥封青布囊白布裏兩端無縫尺一版中約署皇帝帶綬黃地六采不佩璽璽以金銀滕組侍中組負以從秦前民皆佩綬以金玉銀銅犀象為方寸璽各服所好奉璽書使者乘馳傳其驛騎也三騎行晝夜千里為程

諸侯王赤綬

四采赤黃縹紺淳赤圭長二丈一尺三百首太皇太后

皇太后皇后其綬皆與乘輿同長公主天子貴人與諸

侯王同綬者加特也諸國貴人相國皆綠綬三采綠紫

紺淳綠圭長二丈一尺二百四十首

前漢書曰相國丞相皆秦官金印紫

綬高帝相國綠綬徐廣曰金印綠綬音戾草名以染似綠又云似紫紫綬名緇音瓜其色青紫公加殊禮皆得

服之公侯將軍紫綬二采紫白淳紫圭長丈七尺百八十

首前漢書曰太尉金印紫綬御史大夫位上卿銀印青綬成帝更名大司空金印紫綬將軍亦金印漢官儀

曰馬防為車騎將軍銀印青綬在卿上絕席和帝以竇憲為車騎將軍始加金紫次司空九卿中二

千石青綬三采青白紅淳青圭長丈七尺百二十首

一號

青緇綬

自青綬以上緇

音逆

皆長三尺二寸與綬同采而首

半之緹者古佩璲也佩綬相迎受故曰緹紫綬以上緹

綬之間得施玉環鐻云

通俗文曰缺環曰鐻漢官儀曰其斷獄者印為章也

千石

六百石墨綬三采青赤紺淳青圭長丈六尺八十首四

百石三百石長同

漢官儀曰尚書僕射銅印青綬

四百石三百石二百

石黃綬淳黃圭一采長丈五尺六十首自墨綬以下緹

綬皆長三尺與綬同采而首半之百石青紺綸一采宛

轉繆織長丈二尺晉制盛服則雜寶為佩金銀校飾綬

黃赤縹紺四采太子諸王纁朱綬赤黃縹紺相國綠紱

綬三采綠紫紺郡公朱侯伯青朱子男素朱皆三采公
嗣子紫侯嗣子青鄉亭關內侯紫綬白二采郡國太守
內史青尚書令僕射中書監令祕書監皆墨丞皆黃諸
府丞亦然其佩刀者以木代真刀也宋皇太子金璽龜
鈕朱綬四采赤黃縹紺佩瑜玉諸王金璽龜鈕纁朱綬
四采赤黃縹紺佩山玄玉太宰太傅太保丞相司徒司
空金章紫綬佩山玄玉相國則綠紱綬三采綠紫紺自
相國而下或銅印銀章或青綬或墨綬以至別部司馬

以下假墨綬者凡六十等各有差

凡此前衆職江左多不備又多闕朝服諸

應給朝服佩玉而在京師者給朝服非諸烏丸羌戎蠻諸校尉以上及刺史西域戎已校尉皆不給佩玉其來朝會權時假給會罷輸還凡應朝服者而官不給聽自具之諸假印綬而官不給鞶囊者得自具作其位假綬者不得佩綬革古制也按漢代著鞶囊者側在腰間或云傍囊或云綬囊然則以此囊盛綬也或盛或散各有其時

齊乘輿制六璽以金為之並依秦漢之制皇太子諸

王金璽皆龜鈕公侯五等金章其公將軍金章光祿大

夫卿尹太子傅諸領護將軍中郎將校尉郡國太守內

史四品五品將軍皆銀章尚書令僕射中書監令祕書

監丞太子二率諸府長史卿尹丞尉都水使者諸州刺史皆銅印其綬乘輿黃赤纁紺四采太子諸王纁朱綬赤黃纁紺色亦同相國綠綬綬三采綠紫紺羣公朱侯伯青子男素朱皆三采公嗣子紫侯嗣子青鄉亭侯關中關內侯紫綬皆二采郡國太守內史青尚書僕射中書監令祕書監皆墨丞皆黃諸府丞亦然梁制乘輿印璽並如齊制皇太子金璽龜鈕朱綬三百首佩瑜玉帶鹿盧劔火珠首素革帶玉劔獸頭鞶囊諸王金璽龜鈕

纁朱綬百六十首佩山玄玉垂組大帶獸頭鞶腰劔若
加餘官則服其加官之服開國公金章龜鈕元朱綬百
四十首佩山玄玉獸頭鞶腰劔自開國公而下或金章
或金印或銀章或銀印或銅印或青綬或紫綬或墨綬
或黃綬或艾綬或佩水蒼玉或佩五采或無佩而簪筆
者或獸頭鞶或獸爪鞶或腰劔或紫荷執笏或赤舄絢
履或駢縠單衣介幘以至四品將兵以下所領不滿五
十人除版而不給章者凡七十等各有所差陳永定元年

武帝所定乘輿服御皆採梁舊制以天下初定務從節儉應用繡織成者並可彩畫珠玉之飾任用蚌也至天

嘉初悉改易之令一依梁天監舊事北齊制天子六璽

並依舊式

皇帝行璽之璽信璽並白玉為之方一寸三分天子行璽之璽信璽並黃金為之方一寸

二分又有傳國璽白玉為之方四寸螭獸鈕上交蟠螭隱

起鳥篆書文曰受天之命皇帝壽昌凡八字在六璽外

唯封禪以封石函又有督攝萬機印一鈕以木為之長

尺二寸廣二寸五分背上為鼻鈕鈕長九寸厚一寸廣

七分腹下隱起篆文書為督攝萬機凡四字此印常在
內唯以印籍縫用則左戶部郎中度支尚書奏取印訖
轉內皇太子璽黃金為之方一寸龜鈕文曰皇太子璽
宮中大事用璽小事用門下典書坊印諸侯印綬二品
以上並金章紫綬三品銀章青綬四品得印者銀印青
綬五品六品得印者銅印墨綬七品八品九品得印者
銅印黃綬金銀章印及銅印並方一寸皆龜鈕東西南
北四藩諸國王之章上藩用中金中藩用下金下藩用

銀並方寸龜鈕佐官唯公府長史尚書二丞給印綬六品以下九品以上唯當曹為官長者給印餘自非長官雖位尊亦不給諸王纁朱綬四采赤黃纁紺純朱質纁文織長二丈一尺二百四十首廣九寸開國郡縣公散郡公元朱綬四采元赤纁紺朱質元文織長丈八尺百八十首廣八寸開國縣侯伯青朱綬四采青赤白纁朱質青文織長丈六尺百四十首廣七寸開國縣子男名號侯開國鄉男素朱綬三采青赤白朱質白文織長丈

四尺百二十首廣六寸一品二品紫綬三采紫黃赤純

紫質長丈八尺百八十首廣八寸三品四品青綬三采

青白紅純青質長丈六尺百四十首廣七寸五品六品

墨綬二采青紺純紺質長丈四尺一百首廣六寸七品

八品九品黃綬二采黃白純黃質長丈二尺六十首廣

五寸官品從第二以上小綬間得施玉環官有綬者則

有紛皆長八尺廣三寸各隨綬色若服朝服則佩綬公

服則佩紛官無綬者不給佩紛其鞶囊二品以上金縷

三品金銀縷四品銀縷五品六品綵縷七八九品絲縷
獸爪鞶官無印綬者並不給佩鞶囊及爪其佩及劔一

品玉具劔佩山玄玉二品金裝劔佩水蒼玉三品及開

國子男五等散品名號侯雖四品五品並銀裝劔佩水

蒼玉侍中以下通直郎以上陪位則象劔

木劔也言其象真劔帶

劔者入宗廟及升殿若在仗內皆解劔後周皇帝八璽

有神璽有傳國璽皆寶而不用

神璽明受之於天傳國璽明受之於運

皇

帝負宸則置神璽於筵前之右置傳國璽於筵前之左

其六璽並因舊制皆白玉為之方一寸五分高一寸螭
獸鈕三公諸侯皆金印方一寸二分高八分龜鈕七命
以上銀四命以上銅皆龜鈕三命以下銅印銅鼻其方
皆寸其高六分文曰某公官之印凡組綬皇帝以蒼青
朱黃白元纁紅紫緌碧綠十有二色諸公九色自黃以
下諸侯八色自白以下諸伯七色自元以下諸子六色
自纁以下諸男五色自紅以下三公之綬如諸公三孤
之綬如諸侯六卿之綬如諸伯上大夫之綬如諸子中

大夫之綬自紫以下士之綬自緇以下其璽印綬亦如之保定四年百官始執笏常服焉內外命婦皆執笏其拜俛伏方興宇文護始袍加下襴遂為後制隋制神璽寶而不用受命璽封禪則用之餘六璽行用並因舊制其綬自王公侯伯子男為四等又以從正一品三品四品五品亦為四等之差大抵遵北齊之制采純及首微有加減焉自王公以下皆有小雙綬長二尺六寸色同大綬而首半之正從一品施二玉環以下不合有綬者

則有紛皆長六尺四寸廣二尺四分各隨綬色其鞶囊如北齊制其佩一品及五等諸侯並山玄玉五品以上水蒼玉唐貞觀十六年太宗刻受命元璽白玉為螭首其文曰皇天景命有德者昌永徽二年四月勅開府儀同三司及京官文武職事四品五品並給隨身魚上元元年八月勅文武官三品以上金玉帶十二胯四品金魚帶十一胯五品金帶十胯六品七品並銀帶九胯八品九品服並鍮石帶八胯庶人服黃銅鐵帶六胯

其
一
品

下文官並帶手巾筆袋刀子磨石
其武官欲帶手巾筆袋亦聽之

武太后天授元年九

月改内外官所授魚為龜至神龍元年二月京文武官
五品以上依舊式佩魚袋垂拱二年正月赦文諸州都

督刺史並准京官帶魚長壽三年改玉璽為符寶開元

二年七月勅珠玉錦繡既令禁斷准式三品以上飾以

玉四品以上飾以金五品以上飾以銀者宜於腰帶及

馬鐙酒杯杓依式自外悉禁斷

天授二年八月左羽林
大將軍建昌王攸寧借

紫衫金帶借
紫自此始

八年二月勅都督刺史品卑者借緋及魚

袋永為常式天寶十載改傳國寶為承天大寶天子之

寶八一日神寶

所以臣百王鎮萬國寶而不用

二曰受命寶

所以修封禪禮神祇

三曰皇帝行寶

答疏於王公則用之

四曰皇帝之寶

勞來勲賢則用之

五

曰皇帝信寶

召大臣則用之

六曰天子行寶

答四夷書則用之

七曰天

子之寶

慰撫蠻夷則用之

八曰天子信寶

發蕃國兵則用之

凡大朝會

則奉寶以進于御座車駕行幸則奉寶以從于黃鉞車

之內

臣謹按梁制左右光祿大夫加金章紫綬銀章青綬

者同其位但加金紫者謂之金紫光祿大夫但加銀
青者謂之銀青光祿大夫又按北齊之制三品以上
凡是五省官及中侍中省官皆為印不為章四品以
下凡是開國子男及五等散品名號侯皆為銀章不
為印

通志卷四十七

欽定四庫全書薈要卷八千九百四十七

史部

通志卷四十八

宋右迪功郎鄭樵漁仲撰

器服略第二

車輅之制

臣謹按考工記曰一器而工聚焉者車為多上蓋如規象天二十八_{老音}揅象列宿方輿象地三十幅象日

月前則聽鸞和之響傍則睹四時之運等威有辨貴

賤有序者車之制也故書曰明試以功車服以庸洎乎魏晉政教陵遲僭踰莫禁世有變改異制殊狀今略舉沿革云

天子車輅

五輅

古史考云黃帝作車至少昊始駕牛及陶唐氏制彤車乘白馬則馬駕之初也有虞氏因彤車而制鸞車夏后氏因鸞車而制鈎車

鈎之言不採自曲也

奚仲為車正建旂旒尊

卑上下各有等級商因鈎車而制大輅

禮緯曰山車乘鈎乃鈎車之象

昔成湯用而郊祀有山車之瑞山車謂之桑金車似金根之色亦謂之大輅

周因商輅以制

木輅約木以加飾為五輅一曰玉輅以祀二曰金輅以賓同姓以封三曰象輅以朝異姓以封四曰革輅以即戎以封四衛五曰木輅以田以封藩國其制度之詳在禮經秦平天下閱三代之禮或曰商瑞山車金根之色乃因金根車用金飾而為帝軫黑旗皂旂以從水德復法水數駕馬以六漢武帝天漢四年始定輿服之制郊

祀所乘謂之大駕車千乘騎萬疋其儀甚盛不必師古

及赤眉之亂文物無遺後漢光武平公孫述始獲葆車

輿輦因舊制金根車擬周之玉輅最尊者也輪皆朱班

重牙貳轂兩轄

轂外復有一轂抱轄其外乃復設轄抱銅置其中

金薄繆龍為

輿倚較

徐廣曰繆交錯之形也較在箱上說文曰櫜文畫蕃箱也通俗文曰車箱為較

文虎伏

軾龍首銜軛左右吉陽甬鸞雀立衡櫜文畫轅羽蓋華

蚤建大旂十有二旂畫日月升龍駕六馬象鑣鏤錫金

鏤方鈇插翟尾朱兼樊纓赤罽易茸金就十二左纛以

釐牛尾為之在左駢馬軛上大如斗是為德車大駕則

御鳳凰車以金根車為副

其駕黑馬六因秦不改或云始自漢制許慎五經異義說

天子駕六馬以經言時乘六龍以御天故所御皆六餘皆駕四後從為副車

魏武王受漢獻

帝命乘金根車駕六馬設五時副車至明帝景初中山

荏縣黃龍見以為魏得地統服色尚黃戎事乘黑首白

馬齊王正始中詔出入必御輦乘輿晉武帝承魏陳留

王命乘金根車駕六馬備五時副車及受禪設玉金象

革木五輅並為法駕旗旂服用悉取周制文物華藻因

金根車更增其飾朱班漆輪加畫檠文兩箱之後加玳
瑁為鷗翅加以金銀雕飾時人亦謂為金鷗車斜注旂
旗於車之左又加棨戟於車之右皆橐而施之棨戟韜
以黼繡上繫大蛙蟆幡長丈餘於戟之杪轅皆曲向上
取夏商山車垂鈎之義玉輅駕六馬以黑金象革木駕
四馬以黃金為義髦插以翟尾象鑣而鏤錫金鍍而方
鈇許乞反輦纓赤罽易茸金就十有二五輅皆有錫鸞之
飾和鈴之響鈎膺玉璫龍輶華轡朱幘音紛法駕行則五

輅各有所主復制金根車去漢之文物駕四馬不建旗
幟上如畫輪車下猶金根之飾東晉元帝始建戎輅大
輅各一

以商人祀用大輅周人即戎用戎輅故也

因金根車飾皆駕黑馬是

為立壯安帝義熙中平關洛得姚興偽車輦或時乘用
馬宋孝武大明中尚書左丞荀萬秋改造五輅依晉金
根車加赤漆幟畫玉飾諸末建青旗十有二旂駕駟以
黑復因漢之安車章施羽葆蓋以祀金根為金輅建青
旂駕黑馬四羽葆蓋以賓象革木輅並擬玉輅漆幟畫

羽葆蓋象輅視朝革輅即戎二輅並建赤旆駕黑馬四
木輅建赤麾以田駕赤馬四大事法駕五輅俱出齊武
帝永平初伏曼容議齊德尚青旗先青

次赤次白次黑

軍容戎

事宜依漢道行運之色因宋金根車而修玉輅五輅江
左相承駕駟左右駢為六初加玉輅為重蓋棲寶鳳皇
綴金鑷珠璫玉蟬珮四角金龍銜五采眊又麒麟頭加
以采畫馬首戴之竟陵王子良啓曰蓋圓象天軫方象
地上無二天之儀下設兩蓋之飾求諸志錄難為折衷

又假為麟首加乎馬頭事不師古鮮或可施至建武中
明帝乃省重蓋等金輅之飾如玉輅而減少象輅減金
輅革輅如象輅而尤減木輅如革輅建大赤麾首施大
騶幡金輅玉輅建碧旂象輅木輅建赤旂梁武帝初因
齊制天監三年五輅旗麾同用赤而旂不異以從行運
也七年帝據周禮玉輅以祀金輅以賓今祀乘金輅詔
下詳議周捨謂金輅為齊車本不關於祭祀於是改陵
廟皆乘玉輅轡以朱絲陳天嘉初令劉仲舉議造玉金

象革木等五輅及五色副車皆金薄交龍為輿倚較文
豹伏軾虬首銜軛左右吉陽簫鸞雀立衡櫺文畫轡綠
油蓋黃紋裏相思撩金華末斜注旂旗於車之左各依
方色加榮戟於車之右韜以黼繡獸頭幡長丈四尺揭
於戟杪玉輅正副同駕六馬餘皆駕駟並金叉髦插以
翟尾玉為鏤錫又以彩畫蛙蟆綴兩軸頭即漢之飛軫
遺象也五輅兩箱後皆用玳瑁為鷗翅加以金銀雕飾
兩箱之裏衣以紅錦金花帖釘上用紅紫錦為後檐青

紋純帶夏用花簾冬用綺繡褥此後漸修具依梁制後
魏天興初始制軒冕未知古式多違舊章至孝文太和
中儀曹令李韶更議改正唯備五輅各依方色其餘車
輦猶未能具明帝熙平中侍中崔光等議大造車服五
輅並駕五馬亦無經據北齊車服制度多因後魏天保
中所乘是太和中李韶所制五輅後周依周禮設六官
置司輅之職掌皇帝之輅十有二等一曰蒼輅以祀昊
天上帝二曰青輅以祀東方上帝三曰朱輅以祀南方

上帝及朝日四曰黃輅以祭地祇中央上帝五曰白輅以祀西方上帝及夕月六曰元輅以祀北方上帝及感帝祭神州此六輅通漆之而無他飾即周木輅之遺象也馬皆䟽面旂就以方色俱十有二七曰玉輅以享先皇加元服納后八曰碧輅以祭社稷享諸先帝大卜食三老五更享諸侯及耕籍九曰金輅以祀星辰祭四望視朔射饗十曰象輅以望秩羣祀視朝燕射巡省臨學幸道法門十一曰革輅以巡兵即戎十二曰木輅以田

獵行鄉畿此六輅又以六色漆畫之用玉碧金象革物
以飾諸末皆錫面金鈎就以五采俱十有二其輅之式
飾重較加茸馬隋開皇元年内史李德林奏後魏輿輦
乖制請皆廢之唯留太和時李韶所制五輅北齊所遵
者後著令玉輅青質以玉飾諸末重箱盤輿左龍右虎
金鳳翅畫攢文鳥獸黃屋左纛金鳳一在軾前八鑾在
衡二鈴在軾龍輶之上前設障塵青蓋黃裏繡旂帶金
博山綴以鑑子下垂八珮植四十葆羽輪皆朱班重牙

複轄左建太常十有二旂皆畫升龍日月其長曳地右
載闌戟長四尺廣三尺黻文旗首金龍頭銜鈴及綏垂
以結綬駕蒼龍金鏤方鉉插翟尾五雉鏤錫鞶纓十有
二就皆五采繪罽為飾天子祭祀納后則乘之金輅赤
質以金飾諸末左建旗畫飛隼右建闌戟盤輿鳳翅等
並同玉輅駕赤騶臨朝會同饗射飲至則乘之象輅黃
質以象飾諸末左建旌畫桴騂右建闌戟駕黃騶祀后
土則乘之革輅白質輓之以革左建旗畫騶虞右建闌

戟駕白駱巡狩臨兵則乘之木輅黑質漆之左建旒畫
元武右闕戟駕黑騶田獵則乘之其五輅並駕六馬飾
同玉輅復制安車重輿曲壁紫油縵裳通幃朱絲絡網
朱輦纓駕赤騶臨幸所乘

按隋氏五輅遠酌周禮旗苐藻飾近約漢制文質相半

唐因隋制王金象革木是為天子五輅玉輅青質重輿
左青龍右白虎金鳳翅畫檣文鳥獸黃屋左纛金鳳一

在軾前十二鑾在衡

五輅鸞數皆準此制副輅及耕根車則八

二鈴在軾龍

輈前設障塵青蓋黃裏繡飾博山鑑子植羽輪皆朱班

重牙左建旂十有二旂旂畫升龍其長曳地右載闢戟
長四尺廣三尺黻文旂首金龍頭銜結綬及鈴綏駕蒼
龍金錢方鈇插翟尾五隼鏤錫鞶纓十有二就祭祀納
后則供之金輅赤質餘同玉輅駕赤騶饗射祀還飲至
則供之象輅黃質餘同金輅駕黃騶行道則供之革輅
白質鞶以革餘同象輅駕白騶巡狩臨兵事則供之木
輅黑質漆之餘同革輅駕黑騶田獵則供之旌旗鞶纓
及蓋皆從輅色其蓋文裏俱用黃其鏤錫五輅並同其

飾武德初著令天子鑾輅王金象革木五等屬車十乘
指南車記里鼓車白鷺車鑾旗車辟惡車皮軒車耕根
車安車四望車羊車貞觀元年十一月始加黃鉞車豹
尾車通為十二乘以為儀仗之用大駕行幸則分前後
施於鹵簿之內若大陳設則行分左右施於儀仗之中
高祖太宗大禮則乘輅高宗不喜乘輅每有大禮則御
輦至武太后以為常明皇以輦不中禮廢而不用開元
十一年冬祀南郊乘輅而往禮畢騎還

自是行幸郊祀
皆騎於儀仗之

內其五輅腰輿
陳於南簿而已

副車

秦平天下以諸侯所乘之車為副車漢制安車立車各
五乘為乘輿副車輪皆朱班重牙貳轂兩轄金薄繆龍
為輿倚較文虎伏軾龍首銜軛左右吉陽蒲鸞雀立衡
檠文畫輈羽蓋華蚤建大旂十有二旂畫日月升龍駕
六馬象鑣鏤錫金鉸方鈇插翟尾朱兼樊纓赤罽易茸
金就十有二左纛以鼂牛尾為之在左駢馬軛上大如

斗其馬各如方色白馬者朱其髦尾為朱鬣云所御駕

六餘皆駕四後從為副車

應劭漢官典職圖曰承輿大駕則御鳳皇以金根為副

魏因漢制五時副車置髦頭雲罕晉制五安車五立車
合十乘名五時車俗謂五帝車駕旗十二旂各如車色
立車則正植其旗安車則斜注駕馬仍漢制左右駢驂
金鍍鏤錫黃屋左纛縣如金根之制行則從後東晉過江
副車遺缺有事權以馬車代之建旗其上其後制五色
木車象五時車植旗於牛背行則使人輿之

牛之為義蓋取負重

致遠而

安穩

旗常纏而不舒

所謂德車結旌

唯天子親戎五旗舒旆

所謂武

車綏旌

宋因晉而無副車齊王儉議乘黃無副今衣書

車十二乘古副車之象也亦曰五時副車青萌車是謂

掄

他合反

幟車梁依晉置五牛旗車左青赤右白黑黃居

其中象古之五時副車一曰副車陳因舊制五時副車

飾同五輅並駕六馬隋因陳制五時副車色及旗章一

同正輅唯降二等駕用四馬唐之制副輅五乘大駕行

幸皆次於五輅

戎車

周中車氏革輅即戎車車僕掌戎輅之萃音倅廣車之萃闕車之萃革車之萃輕音磬車之萃萃猶

副也此五者兵車所謂五戎也漢戎車不巾不蓋其飾如拼車蓋以牙虎金鼓羽析幢弱鱗冑甲弩之服魏景初改正朔戎車采黑蒼白馬建大赤之旗太始中並建赤旗晉制輕車駕二馬古之獸車也前後二十乘分居左右與輪洞朱建牙戟虎幢置弩於戟上大駕出射聲校尉司馬吏士載以次屬車後宋依漢制戎車建牙麾斜注之載金鼓羽幢置甲弩於戟上輕車之制因漢不易以武剛車為殿孫子兵法曰有巾有蓋謂之武剛車齊梁已下及後周與隋或并用之

獵車

周謂之奇車曲禮曰國君不乘奇車注云獵車也中車氏木輅以田漢制其飾如安車重輶綬輪終

龍統之一曰闕猪車親校獵乘之魏因漢制改名闕虎車晉因魏制一名闕戟車宋因晉制自後無聞

指南車

黃帝與蚩尤戰於涿鹿之野蚩尤作大霧將士皆迷四方黃帝於是作指南車以示方向故後

常建焉出崔豹古今注周致太平越裳氏重譯來獻使者迷其歸路周公為司南之制使載之南周年至國故常為先導示服遠人而正四方漢初置俞兒騎馬為先驅之乘左思曰俞兒騁路指南司方後廢其騎而存其車後漢張衡始復創造漢末喪亂其器不存魏明帝青龍中令博士馬鈞紹作焉車上有木仙人舉手常指南車箱回轉所指微差晉亂復亡東晉義熙十三年劉裕平長安始得此車復修之一名司南車駕駟其下制如樓三級四角金龍銜羽葆刻木為仙人衣羽衣立車上車雖迴運而手常指南大駕出行為先啟之乘此車戎狄所制機數不精迴曲頻驟猶須人力正之范滂人祖沖之有巧思常謂宜更造宋順帝昇明中齊高帝為相命沖之造馬車成使撫軍將軍丹陽尹王僧虔等試之其制甚精百屈千迴未嘗移變齊因宋制而加飾焉梁

復名司南車大駕出為先啓之乘後魏太武帝使工人郭善明造之彌年不就扶風人馬岳又造垂成善明醜殺之唐修之備於大駕行則先導

記里鼓車

東晉安帝義熙十三年劉裕滅後秦所獲未詳其所由來制如指南車駕駟中有木人執

槌向鼓行一里則打一槌崔豹古今注云亦名大章車所以識道里也車上有二層皆有木人執槌行一里下一層擊鼓行十里上一層擊鐃尚方故事存其作法然未詳宋因之不易大駕南簿次指南車後齊因宋制而加飾焉梁因齊制改駕以牛唐復修大駕南簿次指南車後

白鷺車

隋一名鼓吹車車上施層樓樓上有翔鷺棲焉唐因之駕四馬大駕出在記里鼓車後

鸞旗車

漢制鸞旗車折羽毛而編之列繫幢傍胡廣曰以銅作鸞鳥於車衡上晉宋因之駕四馬先路

所載也唐備於大駕

鹵簿次白鷺車從

辟惡車

秦制也桃弓葦矢所以禳祓不祥太卜令一人在車執弓箭出崔豹古今注唐之制駕四馬大

駕出在鷺

旗車後

皮軒車

漢制皮軒車以虎皮為軒晉宋相因駕四馬皆大夫載自後無聞唐備之以大駕鹵簿次於辟

惡車

後

耕根車

漢制耕根車如副車有三蓋一曰芝車置耨耒耜之農上親耕所乘也魏因之建赤旗晉因之

駕駟天子親耕所乘置耒耜於軾上一名三蓋車宋因之隋以青為質三重蓋羽葆雕裝同玉輅駕六馬其軾平以青囊盛耒耜而加之籍田則乘之唐因隋其飾不易大駕行則備馬

安車

周制致仕之老及后乘之漢制乘輿金根車安車立車蔡邕曰五安五立徐廣曰立乘曰高車坐乘

曰安車是為德車五時車安立亦皆如之各如方色馬亦如之建大旂十有二旂駕六馬餘皆駕四皇太子王公列侯皆乘之自漢以後亦為副車晉制因之天子所御則駕六餘皆駕四三公下至九卿各一乘公駕三持進駕二卿駕一宋因之齊制諸王三公國公列侯等行禮則乘之隋制金飾紫通幃朱裏駕四馬臨幸及賜子則供之唐之制以金飾駕四馬臨幸則乘之大駕出在耕根車後

四望車

齊四望車通幃油幢絡班漆輪轂亦曰皂輪車以加貴臣隋制同轎車黃金飾青油紫幃朱裏

紫通幃紫絲網駕一牛拜陵臨弔則乘之唐之制以金飾駕四馬拜陵臨弔則乘之大駕出在安車後

遊車

漢制九遊車九乘大駕為先乘宋因之自後無聞

羊車

晉制羊車一名輦車其上如輶伏兔箱漆畫輪軌武帝時護軍羊琇乘羊車為司隸校尉劉毅糾劾

梁固制羊車小兒衣青布袴褶五辨髻數人引之貴賤通得乘之名牽子也隋大業始置馬制如輶車金寶飾紫錦幘朱絲網馭童二十人皆兩環髻服青衣年十四五者乘之謂之羊車小史駕以果下馬其大如羊唐因之小史十四人

畫輪車

晉制畫輪車駕牛以彩漆畫輪轂上起四夾杖左右開四望綠油幢朱絲青交絡其上形制如

輦其下猶輦車貴者不乘牛車漢武帝推恩之末諸侯寡弱貧者至乘牛車其後稍貴天子至士遂為常乘至尊出朝堂舉哀乘之大駕次羊車後宋齊梁相因為羣公所乘自後無聞

鼓吹車

梁制鼓吹車上施層樓四角金龍銜旒蘇羽葆凡鼓吹陸則樓車水則樓船在殿庭則畫筍簾

為樓上有翔鷺棲焉
或為鶴形自後無聞

象車

晉武帝太康中平吳後南越獻馴象詔作大車駕之載鼓吹十人使越人騎之元正大會入庭大駕

鹵簿行則試橋

道自後不見

黃鉞車

晉制黃鉞車駕一馬大駕行次於華蓋後御麾左右又有金鉞車金鉞車並駕三馬唐貞觀以

後加之備於大駕鹵簿

天寶元年改為金鉞車

豹尾車

周制也古者軍正建之漢制大駕出屬車八十

一乘法駕出屬車三十六乘最後一乘垂豹尾

晉因之在鹵簿之末宋志徐廣按淮南子云軍正執豹

皮以正其衆禮記曰前有士師則載虎皮乘輿豹尾以其

義類唐之制大駕出在黃鉞車後

駕二馬武衛隊正一人在車執之

建華車

晉制建華車二乘駕四馬大駕出分在左右行自後無聞

皇太后皇后車輅

周禮王后之五輅一曰重翟二曰厭翟三曰安車四曰

翟車五曰輦車漢皇后駕輅青羽蓋駕四馬旆九旒後

漢太皇太后皇太后皇后法駕皆御金根車重翟羽蓋

加青交絡帷裳非其法駕則乘紫罽輶車雲襜文畫輶

黃金塗五末

五末輶一轂二箱二共五也

蓋蚤施金花駕三馬左右

駢晉制后乘重翟羽蓋金根車加青絡青帷裳雲襜畫

轅黃金塗五末蓋蚤施金華駕三馬左右駢其廟見小
駕則乘紫罽車飾及駕馬如重翟非法駕則皇太后
乘輿皇后畫車后先蠶乘油畫雲母安車駕六駝馬

駝馬淺

黑色音貴

油畫兩轅安車駕五駝馬為副又金博山駢紫絳

罽車皆駕三駝馬宋因之法駕乘重翟齊因重翟車車
加金塗飾後魏熙平中有司蘇紹議皇后之輅其從祭
則御金根車親喪則御雲母車歸寧則御紫罽車遊行
御安車弔問御紺罽車並駕四馬北齊因之後周皇后

之車十二等一曰重翟以從皇帝祀郊禘享先皇朝皇
太后二曰厭翟以祭陰社三曰翟輅以採桑四曰翠輅
以從皇帝見賓客五曰雕輅以歸寧六曰篆輅以臨諸
道法門六輅皆錫面朱總金鈎七曰蒼輅以適命婦八
曰青輅九曰朱輅十曰黃輅十一曰白輅十二曰元輅
五時常出則供之六輅皆疏面績總隋開皇初李德林
奏用後魏熙平蘇紹議皇后之輅後著令制重翟青質
金飾諸末朱輪金根朱牙其箱飾以重翟羽青油幢朱

裏通幃繡紫帷朱絲絡網繡紫絡帶八鑾在衡鏤錫鞶
纓十二就金鍍方鉉插翟尾朱總駕蒼龍受冊從祀郊
禘享廟則供之厭翟赤質金飾諸末輪畫朱牙其箱飾
以翟羽紫油幢朱裏通幃紅錦帷朱絲絡網紅錦絡帶
餘如重翟駕赤騶親桑則供之翟車黃質金飾諸末輪
畫朱牙其車側飾以翟羽黃油幢黃裏通幃白紅錦帷
朱絲絡網白紅錦絡帶餘如重翟駕黃騶歸寧則供之
諸鞶纓之色皆從車質安車赤質金飾紫通幃朱裏駕

四馬臨幸及弔則供之輦金飾同於蓬輦通幃班輪駕
四馬宮苑近行則乘之屬車三十六乘唐因隋制重翟
厭翟翟車安車其飾不易又制四望車紫油朱質通幃
畫絡帶拜陵臨弔則供之又制金根車朱質紫油通幃
畫絡帶朱絲絡網常行則供之

皇太子皇子車輅

周制巾車氏掌王五輅金輅建大旂以封同姓

同姓謂王子女

弟率以功德出封若魯衛之屬

漢皇太子皆安車朱班輪飛軫青蓋金

花爪倚虎較伏鹿軾櫜文畫幡吉陽簫文輶金塗五末
旂九旂畫降龍皇太子為王賜以乘之皇孫綠車以從
皆左右駢三馬

名皇孫車

魏因之文帝問東平王有輅為是

特賜乎鄭稱對曰天子五輅金輅以封同姓諸侯得與
天子同乘金輅非特賜晉因魏安車而駕三馬非法駕
則乘畫輪車上開四望綠油幢朱絲繩絡兩箱裏飾以
金錦黃金漆塗五末其副車三乘形制如所乘但不畫
輪耳王青蓋車皇孫綠蓋車並駕三左右駢東晉安帝

時乘後山安車制如金輅宋因之皇子為王亦錫以皇
太子之安車皇孫綠車亦因舊法齊皇太子乘象輅校
飾如御旂旗九旂降龍梁因齊象輅制鑾輅駕三左右
駢朱班輪倚獸較伏鹿軾九旂降龍青蓋畫幡文輶金
塗五末以畫輪車為副常乘畫輪則衣書車為副其畫
輪車上開四望綠油幢朱繩絡兩箱裏飾以金錦陳因
梁制後魏乘金輅朱蓋赤質駕四馬北齊因之隋皇太
子金輅赤質金飾諸末重較箱畫檠文鳥獸黃伏鹿軾

龍輶金鳳一在軾前設障塵朱蓋黃裏輪畫朱牙左建
旂九旂右載闕戟旂首金龍頭銜結綴及鈴綏駕赤騮
駟八鑾在衡二鈴在軾金鍔方鈇插翟尾五隼鏤錫鞶
纓九就從祀享廟正冬大朝納妃則乘之輶車金飾諸
末紫通幃朱裏駕一馬五日常朝饗宮官出入行道乘
之四望車金飾諸末紫油幃通幃朱裏朱絲絡網駕一
馬弔臨則乘之唐因隋制

公侯大夫等車輅

周制巾車掌王五輅象輅以封異姓革輅以封四衛木輅以封藩國又曰服車五乘孤乘夏篆卿乘夏縵大夫乘墨車士乘棧車庶人乘役車漢景帝中元五年始詔六百石以上施車幡得銅五末輓有陽籥中二千石以上右駢三百石以上皂布蓋千石以上皂繒蓋二百石以下白布蓋皆有四維杠衣賈人不得乘馬車除吏赤蓋杠其餘皆青大使車立乘駕駟赤帷裳持節者重導從賊曹車斧車督車功曹車皆兩大車伍伯環弩十二

人辟車四人從車四乘小使車不立乘有駢赤屏泥油
重絳帷導無斧車近小使車蘭輿赤轂白蓋赤帷裳從
騎四十人此謂追捕考按有所勅取者之所乘也諸使
車皆朱班輪四幅赤衡輓公卿二千石郊廟明堂祠陵
法出皆大車立乘駕駟他出乘安車公卿以下至縣三
百戶長道從置門下五吏賊曹督察盜賊功曹皆帶劍
三車導主簿主記兩車為從縣令以上加導斧車後漢
制公侯乘安車駕二右駢皆朱班輪飛輪倚鹿較伏熊

軾皂繒蓋黑幡中二千石二千石皆皂蓋朱兩幡千石
六百石朱左幡晉制雲母車以雲母飾犢車臣下不得
乘以賜王公耳皂輪車駕四牛形如犢車皂漆輪轂上
加青油幢朱絲繩絡諸王三公有勲德者特加之位至
公或四望三望夾望車油幢車形制如皂輪但不漆轂
耳通幟車駕牛如犢車但舉其幟通覆車上也諸王三
公並乘之諸公給朝車駕駟安車黑耳駕三各一乘皂
輪犢車各一乘自祭酒掾屬以下及令史皆皂輪特進

及車騎驃騎以上諸大將軍不開府非持節都督者給
安車黑耳駕二三公九卿中二千石二千石河南尹謁
者僕射郊廟法出皆大車立乘駕四他出乘安車其去
位致仕告老賜安車駟馬郡縣公侯安車駕二右駢皆
朱班輪倚鹿較伏熊軾黑輜皂繒蓋公旗旂八旂侯七
旂卿五旂皆畫降龍中二千石二千石皆皂蓋朱兩轡
駕二中二千石以上右駢千石六百石朱左轡王公之
元子攝命理國者安車駕三旗旂七旂其封侯之元子

五存大使車立乘駕四赤帷裳騶騎道從舊公卿二千
石郊廟上陵從駕所乘小使車不立乘駕四輕車之流
也蘭輿皆朱轂赤屏泥白蓋赤帷裳又別有小使車赤
轂皂蓋追捕執取者所乘凡諸使車皆朱班輪赤衡軛
追鋒車去小平蓋加通幔如輅車駕二追鋒者以迅速
為名施於戎陣之間是為傳乘輅車古之將軍車也一
馬曰輅車二馬曰輅傳按漢世貴輜輶而賤輅車魏晉
重輅車而賤輜輶三品將軍以上尚書令輅車黑耳有

後戶僕射但有後戶無耳並皂輪也宋因晉有追鋒車
雲母車四望車公及列侯所乘安車依漢舊制駕二馬
旂旗旂王公侯七卿五皆降龍公卿中二千石郊陵法
出皆大車立乘駕四他出去位致仕皆安車駟馬中二
千石皆皂蓋朱轡銅飾五末駕二右駢王公世子攝命
理國者安車駕三旂旗七旂侯世子五旂齊制黃屋車
建碧旂九旂九命上公所乘青蓋安車朱轡班輪駕一
左右駢通幃車為副諸王禮行所乘皂蓋安車朱轡漆

班輪駕一馬通幃朱車為副三公禮行所乘安車黑耳
皂蓋朱幡駕一牛車為副國公列侯禮行所乘馬車駕
一九卿領護二衛驍游四軍五校從郊陵所乘餘同晉
法梁制二千石四品以上及列侯皆給輅車駕牛伏兔
箱青油幢朱絲絡網轂皆黑漆天監二年令三公開府
尚書令則給鹿輅輅施耳後戶皂輜尚書僕射左右光
祿大夫侍中中書監令祕書監則給鳳輅輅後戶皂輜
領護國子祭酒太子詹事尚書侍中列卿等則給聊泥

輅無後戶漆輪車騎驃騎及諸王除刺史帶將軍則給
龍雀輅以金根飾御史中丞給方蓋輅形小如傘諸王
三公有勲德者皆特加皂輪車駕牛形如犢車但烏漆
輪轂黃金雕裝上加青油幢朱絲絡通幟王公加禮者
給油幢絡車駕牛朱輪華轂後魏三公及王車朱屋青
蓋制同五輅名曰高車駕三馬庶姓王侯及尚書令僕
以下列卿以上並給輅車駕一馬或乘四望通幟車駕
一牛北齊因之庶姓王至儀同三司以下翟尾扇紫傘

皇宗及三品以上官青傘朱裏其青傘碧裏達於士人

不禁正從一品執事散官及儀同三司乘油色朱絡網

車車牛飾得用金塗及純銀二品三品得乘卷通幃車

車牛飾用金塗四品以下七品以上得乘偏幃車車牛

飾以銅後周諸公之輅九方輅

各象方之色

碧輅金輅皆錫

面輦纓九就金鈎象輅犀輅貝輅革輅篆輅木輅皆疏

面輦纓九就凡就皆以朱白蒼三采諸侯自方輅而下

八無碧輅諸伯自方輅而下七又無金輅諸子自方輅

而下六又無象輅諸男自方輅而下五又無犀輅凡就
各如其命三公之輅車九祀輅犀輅貝輅篆輅木輅夏
輅縵車墨車棧車自篆輅以上金塗諸末疏錫鞶纓金
鈎木輅以下銅飾諸末疏面鞶纓皆九就三孤自祀輅
而下八無犀輅六卿自祀輅而下七又無貝輅上大夫
自祀輅而下六又無篆輅中大夫自祀輅而下五又無
木輅下大夫自祀輅而下四又無夏輅士車三祀車墨
車棧車凡就各如其命數自孤以下就以朱綠二采隋

制公及一品象輅黃質以象飾諸未建旗畫以鳥隼受冊告廟升壇上任親迎及葬則乘之侯伯及二品三品革輅白質建旗畫熊虎受冊告廟親迎及葬則乘之子男及四品木輅黑質以漆飾之建旒畫龜蛇受冊告廟親迎及葬則乘之象輅以下存及就數各依爵品犢車則魏武賜楊彪七香車也駕牛自王公以下至五品以上並給乘之三品以上青幃朱裏五品以上紺幃碧裏皆白銅裝唯有參謁及弔喪者則不張幃而乘鐵裝車

六品以下不給任自乘犢車弗許施幃初五品以上乘
偏幃車其後嫌其美停不用以白幃代之三品以上通
幃車則青壁一品軺車油幃朱網唯車輅一等聽勅始
得乘之唐王公以下車輅親王及武職一品象輅自餘
及二品三品革輅四品木輅五品軺車象輅朱班輪左
建旂旂畫龍一
升一降右載闔戟革輅以革飾左建旌通帛
為旌餘

同象輅木輅以漆飾之餘同革輅軺車曲壁青通幃諸
輅質蓋旂旌皆朱一品九旂二品八旂三品七旂四品

六存其輦纓就數皆准此

主妃命婦等車

漢制長公主乘赤罽駢車大貴人公主王妃封君油畫駢車大貴人加節畫輶皆右駢而已公列侯中二千石二千石夫人會朝若親蠶各乘其夫之安車右駢加交絡帷裳皆皂非公會不得乘朝車得乘漆布輶駢車銅飾五末晉制三夫人油駢車駕兩馬左駢其貴人加節畫輶三夫人助蠶乘青交絡安車駕三皆以紫絳罽駢

車九嬪世婦乘輶車駕三長公主亦輶輶車駕兩馬公主王太妃王妃皆油輶車駕兩馬右駢公主油畫安車駕三青交絡以紫絳罽輶車駕三馬為副王太妃三夫人亦如之公主助蠶乘油畫安車駕三公主有先置者乘青交絡安車駕三諸王妃公太夫人夫人縣鄉郡公侯持進夫人助蠶乘皂交絡安車駕三諸侯監國世子之世婦侍中常侍尚書中書監令卿校世婦命婦助蠶乘皂交絡安車儷駕郡縣公侯中二千石二千石夫人

會朝及蠶各乘其夫之安車皆右駢皂交絡皂帷裳自非公會則不得乘輅車王妃特進夫人封郡君安車駕三皂交絡封縣鄉君油輶車駕兩馬右駢宋齊依晉無大更革梁天監二年令上臺六宮長公主公主諸王太妃王妃皆得乘青油輿搨幢通幃車以搨幢涅幃為副采女皇女諸王嗣子侯夫人皆乘赤油搨幢車以涅幃為副侍女直乘涅幃二乘後周制公夫人之輅車九厭翟翟輅翠輅皆錫面朱總金鈎雕輅篆輅皆勒面

刻白黑韋

為當

纁總朱輅黃輅白輅元輅皆雕面

刻漆韋為當纁

鷩總黑

色繪其著

如朱總

諸侯夫人自翟輅而下八諸伯夫人自翠輅

而下七諸子夫人自雕輅而下六諸男夫人自篆輅而

下五顰纓就數各視其君三妃三公夫人之輅九篆輅

朱輅黃輅白輅元輅皆勒面纁總夏篆夏縵墨車棧車

皆雕面鷩總三代

由力反

三孤內子自朱輅而下八六嬪

六卿內子自黃輅而下七上媛婦中大夫孺人自元輅

而下五下媛婦下大夫孺人自夏篆而下四御婉士婦

人自夏縵而下三其輦纓就各以其等皆輦第漆之君以赤卿大夫士以黑君駕四馬三輦六轡卿大夫士駕二馬一輦四轡隋制皇太子妃乘翟車以赤為質駕三馬畫轅金飾犢車為副紫幟朱網絡良娣以下並乘犢車青幟朱裏三公夫人公主王妃並犢車紫幟朱網絡五品以上命婦並乘青幟與其夫同唐制內命婦夫人乘厭翟車嬪乘犢車婕妤以下乘安車各駕二馬外命婦公主王妃乘厭翟車駕二馬自餘一品乘白銅飾犢

車青通幃朱裏油幢朱絲網駕牛二品以下去油幢絡網四品青偏縵其王公以下車輅皆太僕官造貯掌之若受制行冊命及三時巡陵婚葬則給之

輦輿

輦人所輦也徐爰釋問云天子御輦侍中陪乘今輦制象輅車而不施輪通幃朱絡飾以金玉用人荷之或曰夏后氏末代制輦名曰余車商曰胡奴車周曰輜車即輦也王妃輦車組紃有嬰羽蓋秦為人君之乘漢因之

成帝遊後庭則乘輦魏晉小出則乘之亦多乘輿東晉
過江亡其制度至太元中謝安率意造焉及破苻堅於
淮上獲京都舊輦形制無差義熙五年劉裕執慕容超
獲金鉦輦宋因之齊亦因之而盛增其飾又制卧輦校
飾如坐輦不堪服用復制小輿形如輶車小行幸則乘
之輿說文云復竹輿也周禮考工記曰周人上輿漢室
制度以雕玉為之方徑六尺今輿制如輦而但小耳宮
苑宴私則御之梁制小輿似輶車金裝漆畫施八橫元

正大會乘出上殿西堂舉哀亦乘之行則從後一名羊車一名輦其上如輶小兒衣青布袴褶五辮髻數人引之漢氏或以人牽或駕果下馬梁貴賤通乘名曰牽子又制步輿方四尺上施隱膝優老者人輿升殿司徒謝朓以脚疾優之自天子至下賤得通乘步輿又制副輦

加笨

步本反

如犢車通憶朱絡謂之蓬輦後魏道武帝天

興初始修軒冕制乾象輦羽葆圓蓋畫日月五星二十八宿天街雲罕山林奇瑞遊麟飛鳳朱雀元武騶虞青

龍駕二十四馬又制大樓輦車龍輦加玉飾四轂六衡
方輿圓蓋建太常畫升龍日月駕二十牛又制象輦左
右金鳳白鹿仙人羽葆旒蘇金鈴玉佩初駕二象後以
六駝代之復有遊觀小樓等輦駕十五馬車等草創修
制多違舊章隋制輦而不施輪通幃朱絡飾以金玉而
人荷之又依梁制副輦復制輿如輦而小宮苑私宴御
之小輿幃方形同幄帳自閤內升正殿御之唐制輦有
七一曰大鳳輦二曰大芳輦三曰仙遊輦四曰小輕輦

五曰芳亭輦六曰大玉輦七曰小玉輦輦有三一曰五色輦二曰常平輦三曰腰輦大駕鹵簿先五輅而行

旌旗

黃帝振兵教熊羆貔貅猛虎制陣法設五旗五麾夏氏奚仲為車正建旗旂旐以別尊卑等級商因之周制司常掌九旗王建太常諸侯建旂孤卿建旌大夫士建物師都建旗州里建旗縣鄙建旐道車載旐游車載旌大麾以田大帛以即戎翻旌龍旗秦水德旗旂皆尚黑其

制未詳漢制龍旂九旂七仞以象大火鳥旗七旂五仞以象鶉火熊旗六旂五仞以象參伐龜蛇旂四旂四仞以象營室弧旌枉矢以象弧也此諸侯以下之所建也後周太常畫三辰旂畫青龍旗畫朱鳥旌畫黃麟旗畫白虎旂畫元武皆加雲氣其旌物在軍亦畫其事號加以雲氣徽幟亦如之旌節又畫白虎而折羽於其上又司常掌旗物之藏通帛之旗六以供郊丘之祀蒼青朱黃白黑六旗畫績之以充玉輅之等一曰三辰之常二

曰青龍之旗三曰朱鳥之旗四曰黃麟之旗五曰白虎
之旗六曰元武之旗皆左建旗而右建闌戟又有繼旗
四以施軍旅一曰麾以供軍將二曰旐以供師帥三曰
旂以供旅帥四曰旆以供卒長諸公方輅碧輅建旂金
輅建旗篆輅建物木輅建旐諸侯自金輅而下如諸公
之旗諸伯自象輅而下如諸侯之旗諸子自犀輅而下
如諸伯之旗諸男自篆輅而下如諸子之旗三公犀輅
貝輅篆輅建旐木輅建旐夏篆夏纓及棧車建物孤卿

以下各以其等建其旗旌杠皇帝六仞諸侯五大夫四
士三苻皇帝曳地諸侯及軹大夫及轂士及軫凡注毛
於杠首曰綏析羽曰旌全羽曰旒

鹵簿

屬車附

古者諸侯九乘秦滅九國兼其車服故制大駕屬車八
十一薛綜曰屬者相連屬也皆在後貳行法駕半之左右分行其車皆皂

蓋赤裏朱轡輜戈矛弩箛尚書御史所載最後一乘垂

豹尾以前為省中

胡廣曰施之道路故須豹尾過後屯圍乃得解省中即今之仗內

漢

制乘輿大駕備車千乘騎萬匹屬車八十一乘公卿奉引太僕大將軍參乘祀天於甘泉用之後漢明帝上原陵大喪並因前代為大駕用八十一乘祀天南郊則法駕用三十六乘河南尹執金吾雒陽令奉引奉車郎御史侍中參乘前驅有九旂雲罕鳳皇車闔戟車皮軒車鸞旗車後有金鉦車黃鉞車黃門鼓車黃門令校駕祀天南郊以法駕祀地明堂省什三祀宗廟尤省謂之小駕每出太僕奉駕上鹵簿中常侍小黃門副尚書主者

郎令史副侍御史蘭臺令史副皆執法以督整車騎謂之護駕春秋上陵尤省於小駕直事尚書一人從晉制大駕鹵簿先象車鼓吹一部十三人中道次靜室令駕一中道式道候二人駕一分左右次洛陽尉二人騎分左右次洛陽亭長九人赤車駕一分三道鼓吹正二人引次洛陽令皂車駕一中道次河南中部掾中道河橋掾在左功曹史在右並駕一次河南尹駕駟戟吏六人次河南主簿駕一中道次河南主記駕一中道次司隸

部河南從事中道部部從事居左別駕從事居右並駕
一次司隸校尉駕三戟吏六人次司隸主簿駕一中道
次司隸主記駕一中道次廷尉明法掾中道五官掾居
左功曹史居右並駕一次廷尉卿駕駟戟吏六人次廷
尉主簿主記並駕一在左太僕引從如廷尉在中宗正
引從如廷尉在右次太常駕駟中道戟吏六人次太常
外部掾居左五官掾功曹史居右並駕一次光祿引從
中道太常主記居左衛尉引從居右並駕一次太尉外

督令史駕一中道次東西捕賊倉戶等曹屬並駕一引
從次太尉駕駟中道太尉主簿舍人各一人祭酒二人
並駕一在左右次司徒引從駕駟中道次司空引從駕
駟中道三公騎令史戟各八人鼓吹各一部七人次中
護軍中道駕駟鹵簿左右各二行戟楯在外弓矢在內
鼓吹一部七人次步兵校尉在左長水校尉在右並駕
一各鹵簿左右二行戟楯在外刀楯在內鼓吹各一部
七人次射聲校尉在左翊軍校尉在右並駕一皆鹵簿

左右各二行戟楯在外刀楯在內鼓吹各一部七人驍
騎將軍在左游擊將軍在右並駕一皆鹵簿左右引各
二行戟楯在外刀楯在內鼓吹各一部七人騎隊五在
左五在右隊各五十匹命中督二人分領左右各有戟
吏二人麾幢揭鼓在隊前次左將軍在左前將軍在右
並駕一皆鹵簿左右各二行戟楯在外刀楯在內鼓吹
各一部七人次黃門麾騎中道次黃門前部鼓吹左右
各一部十三人駕駟八校尉佐仗左右各四行外大戟

楯次九尺楯次弓矢弩並熊渠欽飛督領之次司南車
駕駟中道護駕御史騎夾左右次謁者僕射駕駟中道
次御史中丞駕一中道次虎賁郎將騎中道次九旂車
中道武剛車夾左右並駕駟次雲罕車駕駟中道次關
戟車駕駟中道長戟邪偃向後次皮軒車駕駟中道次
鸞旗車中道建華車分左右並駕駟次護駕尚書郎三
人都官郎中道駕部在左中兵在右並騎又有護駕尚
書一人騎督攝前後無常次相風中道次司馬督在前

中道左右各司馬史三人引仗左右各六行外大戟楯
二行次九尺楯次刀楯次弓矢次弩次五時車左右有
遮列騎次典兵中郎中道督攝前却無常左殿中御史
右殿中監並騎次高蓋中道左畢右罕次御史中道左
右節郎各四人次華蓋中道次殿中司馬中道殿中都
尉在左殿中校尉在右左右各四行細楯一行在弩內
又殿中司馬一行殿中都尉一行殿中校尉一行次櫜
鼓中道次金根車駕六馬中道太僕卿大將軍參乘左

右又各增三行為九行司馬史九人引大戟楯二行九尺楯一行刀楯一行由基一行細弩一行細跡禽一行椎斧一行刀楯一行連細楯殿中司馬都尉殿中校尉為左右各十二行金根車建青旂旂十二左將軍騎在左右將軍騎在右殿中將軍持鑿腦斧夾車車後衣書主職步從六行合左右三十二行次曲華蓋中道侍中散騎常侍黃門侍郎並騎分左右次黃鉞車駕一在左御麾騎在右次相風中道次中書監騎左祕書監騎右

次殿中御史騎左殿中監騎右次五牛旗赤青在左黃
在中白黑在右次大輦中道太官令丞在左太醫令丞
在右次金根車駕駟不建旗次青立車次青安車次赤
立車次赤安車次黃立車次黃安車次白立車次白安
車次黑立車次黑安車合十乘並駕駟建旗十二旂如
車色立車正豎旗安車邪拖之次闐豬車駕駟中道無
旗次耕根車駕駟中道赤旗十二旂熊渠督左飲飛督
右次御輅車次御四望車次御衣車次御書車次御藥

車並駕牛中道次尚書令在左尚書僕射在右又尚書郎六人分左右並駕又治書侍御史二人分左右又侍御史二人分左右又蘭臺令史分左右並騎次豹尾車駕一自豹尾車後而鹵簿盡矣但以神弩二十張夾道至後部鼓吹其五張神弩置一將左右各二將次輕車二十乘左右分駕次旒蘇馬六十匹次金鉞車駕三中道左右護駕尚書郎并令史並騎各一人次金鉞車駕三中道左右護駕侍御史并令史並騎各一人次黃門

後部鼓吹左右各十三人次戟鼓車駕牛二乘分左右
次左大鴻臚外掾右五官掾功曹史並駕一次大鴻臚
駕駟戟吏六人次大司農引從中道大鴻臚主簿主記
右少府引從次三卿並騎吏四人鈴下二人執馬鞭辟
車六人執方扇羽林十人朱衣次領軍將軍中道鹵簿
左右各二行九尺楯在外弓矢在內鼓吹如護軍次後
軍將軍在左右軍將軍在右各鹵簿鼓吹如左軍前後
次越騎校尉在左屯騎在右各鹵簿鼓吹如步兵射聲

次領護騎遊軍校尉皆騎吏四人乘馬夾道都督兵曹
各一人乘馬在中騎將軍四人騎校靴角金鼓鈴下信
幡軍校並駕一功曹史主簿並騎從繖扇幢麾各一騎
鼓吹一部七騎次領護軍加大車斧五官掾騎從次騎
十隊隊各五十匹將一人持幢一人持靴一人並騎在
前督戰伯長各一人並騎在後羽林騎督幽州突騎督
分領之郎簿十隊隊各五十人絳袍將一人騎靴各一
人在前督戰伯長一人步在後騎皆持稍次大戟一隊

九尺楯一隊弓一隊弩一隊隊各五十人黑袴褶將一人步在前督戰伯長各一人步在後金顏督將并領之其屬車因後漢制東晉屬車五乘而已其一車又是軺車舊儀天子所乘駕六元興中屬車唯九乘苻堅敗又得偽車輦增為十二乘宋孝建中尚書令王宏議屬車起秦八十一及三十六乘並不出經典自胡廣蔡邕傳說耳又是從官所乘非常副車正數江左五乘則儉不中禮帝王文物旗旒皆十二為節今宜依禮十二乘為

制後魏道武皇帝天興二年命禮官採古法制三駕鹵

簿一曰大駕設五輅建太常屬車八十一乘大祠則設

之二曰法駕屬車三十六乘小祠則設之三曰小駕屬

車十二乘遊晏離宮則設之隋開皇中大駕十二乘法

駕減半煬帝大業初復備八十一乘並如犢車紫通幃

朱絲絡網黃金飾駕一牛在鹵簿中單行正道後帝嫌


多大駕減為三十六乘法駕用十二小駕除之唐大駕

屬車十二乘大駕行幸則分前後於鹵簿之內若陳設

則分左右施於衛內其鹵簿制具開元禮



通志卷四十八



總校官庶吉士臣侍朝

校對官編修臣閔懋大

謄錄監生臣宋維翰